

四庫全書

史部

欽定四庫全書

史部

姑蘇志卷四十九

詳校官編修<sub>臣</sub>曹振鏞

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>李 燾

謄錄監生<sub>臣</sub>沈安邦

欽定四庫全書

姑蘇志卷四十九

明 王鏊 撰

人物七 名臣

鄭戩字天休吳縣人祖延紹大理評事蘇州錄事叅軍  
父文遂字百昌溫州推官善筆札能音律愛客重義  
赴人急難卒贈屯田員外郎戩少孤既長客京都師事  
楊億以屬辭知名後復還吳億卒賓客弟子散去戩  
乃倍道會葬舉進士由科尤工詩與葉清臣相埒時

以比元白授太常寺奉禮郎簽書寧國軍節度判  
官事李迪薦其材召試學士院為光祿寺丞集賢校  
理通判越州還改太子中允同知太常禮院升直史  
館三司戶部判官同脩起居注以右正言知制誥訓  
詞深雅有常楊風判國子監徙知審刑院遷起居舍  
人龍圖閣直學士權知開封府吏馮士元為姦利有  
告其受賕藏禁書者戢窮治之辭連呂夷簡盛度程  
琳遂逮捕夷簡子公綽公弼參劾其狀流士元海島



琳坐嘗交關士元罷去其餘黜罰者孔道輔龐籍又  
十餘人朝議畏其皦核戢敏彊善聽決喜出不意獨  
假貸細民即豪宗大姓繩治益急政有能迹徙權三  
司使復轉運使攷課格分別殿最又句較三司出入  
得羨錢四百萬緡以右諫議大夫同知樞密院改樞  
密副使為呂夷簡所忌罷以資政殿學士知杭州錢  
唐湖溉田數千頃錢氏嘗置掠清軍以疏淤填既納  
國後不復治葑土堙塞勢族僧房占冒湖益狹戢發

丁夫數萬闢之民賴其利事聞詔本郡歲治如戩法  
遷給事中徙并州道改鄆州又徙永興軍建言凡軍  
行所須下有司相緩急析為三等非急罷去先是衙  
吏輸木京師浮渭泛河多漂沒既至則席不中程往  
往破家不能償戩奏歲減二十餘萬又奏罷括糴以  
勸民積粟長安故都多豪惡戩治之尚嚴甚者至黥  
竄人皆惕息未幾代范仲淹為陝西四路都總管兼  
經畧安撫招討使駐涇州聽便宜從事元昊謂其下

曰我已遣使稱臣朝廷何為復用此公護諸將其畏  
憚如此遷尚書禮部侍郎時知慶州滕宗諒知渭州  
張亢過用公使錢戩致于法行邊至鎮戎軍趣蓮花  
堡天寒與將佐置酒元昊擁兵近塞會莫塵起有報  
寇至戩曰此必三川將按邊回非敵騎也已而果然  
及疆事少寧詔還知永興軍番首部將遮道卧轍不  
得行時長安久旱戩下車而雨衆謂涇川雨隨鄭公  
來初靜邊砦主劉滄謀築永洛經公二城以通秦渭

援兵招生羌大王族為邊衛戡使滄及董士廉督其  
役會罷戡四路安撫使韓琦知渭州尹洙皆以為不  
便召滄士廉罷役歸不聽乃使裨將狄青帥兵以往  
械從順德軍獄戡力爭於朝卒城之進戶部侍郎資  
政殿大學士知并州契丹與元昊交兵邊奏互上獨  
戡不以聞詔遣使問其故戡對曰兩國相攻中國不  
足憂也廊府間有棄地曰草城川戡募土人為弓箭  
手計口給田初兵興用不足河東行錢山多炭鐵鼓

鑄利厚重刑不能止戢乃使三當一令既下兵民相  
扇動數千人邀走馬承受訴承受中貴人不能遏又  
羣譟州門戢悉召至推首謀者數十人黥隸他州事  
乃定遷吏部侍郎改宣徽北院使拜奉國軍節度使  
卒于官上震悼遣中貴人給舸護柩還吳敕所過治  
道本州給葬事贈太尉諡文肅戢遇事果敢必行然  
憑氣近俠用刑深峻士民多怨之弟戡戡戡刑部侍  
郎戡進士康定中太子中舍知無錫縣戢孫時

時字是翁少苦學登進士改秩知當塗縣律身清謹政  
尚寬厚先教化而後敲支民皆得其歡心告滿通判  
建康府留守鼂謙之待以長者所贊貳言無不從以  
疾奉祠歸官至朝奉大夫時性嗜書老而益勤自左  
氏史漢三國南北至諸名家文集手事編錄以及稗  
官詞說靡不徧覽邦人推重從游甚衆所指授輒為  
名人

李育字仲蒙吳縣人舉進士第四能為詩字畫亦清麗

性高簡故官不甚顯亦少知之者

盧革字仲辛德清人少舉童子知杭州馬亮見其詩嗟異之秋貢士密戒主司勿遺革聞語人曰以私得薦吾恥之去弗就後二年遂首選至登第年才十六慶厯中知龔州蠻入寇桂管騷動革經畫軍須先事而集移書安撫使杜杞請治諸郡城及易長吏之不才者又言嶺外小郡合四五不當中州一大縣無城池甲兵之備將為賊困宜度遠近并省之後儂智高來

九郡相繼不守皆如革慮知婺泉二州提點廣東刑  
獄福建湖南轉運使復請外神宗謂宰相曰革廉退  
如是宜與嘉郡遂知宣州累進太子賓客以光祿卿  
致仕用子秉恩轉通議大夫退居於吳子孫遂為吳  
人十五年秉為發運使得請歲一歸覲後帥渭州乞  
解官終養帝數詔慰勉時以為榮卒年八十二贈少  
師

秉字仲甫未冠有俊譽嘗謁蔣堂坐池亭堂曰亭沼粗



適恨林木未就爾秉曰亭沼如爵位時來或有之林  
木非培植根株弗大成似士大夫立名節也堂嘗味  
其言曰吾子必為佳器中進士甲科調吉州推官青  
州掌書記知開封府倉曹叅軍浮湛州縣二十年人  
無知者王安石得其壁間詩識其靜退方置條例司  
預選中奉使淮淝治鹽法與薛向究索利病出本錢  
鬻鹽濱海之民戒不得私鬻還奏遂為定制檢正吏  
房公事提點兩浙淮東刑獄專提舉鹽事持法苛嚴

追胥連保罪及妻孥一歲中犯者以千萬數進制置發  
運副使東南饑詔損上供米價以糶東言價雖賤  
貧者終艱得錢請但償糶本而以其餘販贍是歲上  
計神宗問曰聞滁和民捕蝗充食有諸對曰有之民  
饑甚死者相枕藉帝惻然曰前此特趙抃為朕言之  
爾先是發運使多獻餘羨以希恩寵秉言職在董督  
六路財賦以時上之安得羨今稱羨者率正數也請  
罷獻獨以七十萬緡償三司逋加集賢殿脩撰知渭

州五路大出西討唯涇原有功進寶文閣待制夏境  
胡盧川距塞二百里恃險遠不設備秉遣將姚麟彭  
孫襲擊之俘斬萬計遷龍圖閣直學士夏酋仁多嵬  
丁舉國入寇犯熙河定西城秉治兵瓦亭分兩將駐  
靜邊砦指夏人來路曰吾遲明坐待捷報矣及明果  
至見宋師驚曰天降也縱擊之皆奔潰或言嵬丁已  
死有識其衣服者將請以聞秉曰幕府上功患不實  
吾敢以疑似成欺乎他日物色之嵬丁果死哀賜服

馬金幣秉守邊久表父革年老乞歸移知湖州行三  
驛復詔還渭慰藉優渥革聞亦以義止其請已而革  
疾亟乃得歸元祐中知荆南劉安世論其行鹽法虐  
民降待制提舉洞霄宮卒贈少師有文集十卷奏議  
三十卷子知原

知原字行之以父任知歙縣因近臣薦赴都堂審察累  
遷梓州路轉運副使時承平既久戎備皆弛知原招  
補兵籍築城亘二十餘里王黼當國費出無藝知原

因疏言之黼怒罷去久之起提點京東刑獄改江西  
轉運副使過闕入奏徽宗勉之曰卿在蜀道功效甚  
休遂賜三品服先是綱運阻於重江吏卒並緣為姦  
知原悉意經理故先諸道上京師進一官尋除直祕  
閣為江淮荆浙等路發運使升祕閣脩撰提舉河北  
以言者劾落職歸吏部高宗即位復龍圖閣知温州  
時葉濃陷建州楊勅陷處州知原繕甲兵增城浚隍  
聲勢隱然帝東幸知原繇海道轉粟及金縉十餘萬

至台州召見稱獎擢右文殿脩撰管內安撫使在郡  
四年民繪像祠之王師討范汝為召為添差兩浙轉  
運使罷提舉太平觀都督孟庚辟為叅謀改徽猷閣  
待制知臨安府諫官唐輝言知原為政乖謬詔復為  
都督府叅謀官章再上遂以舊職奉祠紹興十一年  
卒弟法原

法原字立之自知雍丘縣積官太府少卿賜同上舍出  
身使遼還遷司農卿賜三品服為吏部尚書以官秩

次第履歷總為一書功過殿最開卷瞭然更不能欺  
坐王黼累罷為顯謨閣待制紹興元年提舉臨安洞  
霄宮張浚承制起知夔州二年改龍圖閣學士川陝  
等路宣撫處置副使四年進端明殿學士川陝宣撫  
副使金人攻關輔叛將史斌陷興州諸郡多應者法  
原命將堅壁言戰者斬衆以為怯未幾河東經制使  
王燮以乏食班師法原開關納之與燮同破斌復興  
州方巨盜充斥秦隴叛兵欲窺蜀法原極意拊循嚴

為備禦傳檄諸路人心稍安視山川險阻分地置將  
前後屢捷上所倚重會烏珠攻闕為吳玠所敗法原  
與玠素不睦玠因奏功訟法原不濟師不餽糧不銓  
一立功將士帝手詔詰問法原宣撫川陝上從容謂  
知原曰朕方以川陝付法原蓋兄弟皆以材見稱故  
並用之五年春沒於王事詔歸葬平江

葉清臣字道卿本烏程人父參字少列咸平中進士兵  
刑二部郎中知蘇越湖三州終光祿卿謝事居吳遂



為長洲人清臣幼敏異好學善屬文舉進士知舉劉  
筠奇其策擢第二宋進士以策擢高等自清臣始授  
太常寺奉禮郎僉書蘇州觀察判官事還為光祿寺  
丞集賢校理通判太平州知秀州入判三司戶部  
院改鹽鐵判官上言請遣使循行天下知民疾苦察  
吏能興太學選置博士許公卿大臣子弟補學生重  
縣令諸科舉人取明大義責以策問省流外官無得  
入仕聽武臣終三年喪罷度僧廢讀經一業訓兵練

將慎出令簡條約文多不載出知宣州累遷太常丞  
同脩起居注判三司鹽鐵句院進直史館京師地震  
上疏極言時闕失范仲淹余靖以言事被黜天下之  
人齟舌不敢議朝政者將二年願深自咎責許忠直  
敢言之士庶幾明威降鑒數日仲淹等皆遷徙會詔  
求直言清臣復上疏言大臣專政仁宗嘉納之寶元  
初清臣請外為兩浙轉運副使並太湖有民田豪右  
據上游水不得泄民莫敢訴遂請疏盤龍滙滬瀆入

于海人賴其利康定初以右正言知制誥知審官院判國子監時陝西用兵趙元昊圍延州既解去鈐轄內侍盧守勲與通判計用章訟于朝朝議薄守勲罪流用章嶺南清臣悉疏其事而守勲降湖北兵馬都監時西師急於經費擢為起居舍人龍圖閣學士權三司使公事始編前後詔敕刪去簿帳冗長者而謹其出納焉清臣與宋庠鄭戩善為呂夷簡所惡慶厯初出知江寧府入為翰林學士知通進銀臺司旬當

三班院丁父憂服除以翰林侍讀學士知邠州道繇京師因請對改澶州進戶部郎中知青州徙知永興軍浚三白渠溉田踰六千頃上御天章閣召公卿出手詔問當世急務清臣條對極論時政闕失言多劇切權貴會河決商湖北道艱食復以為翰林學士權三司使皇祐元年上御便殿訪近臣以備邊擇將之畧清臣上對今輔弼之臣抱忠義之深者莫如富弼為社稷之固者莫如范仲淹諳古今政事者莫如夏

竦議論之敏者莫如鄭戩方面之才嚴重有紀律者  
莫如韓琦臨大事能斷者莫如田況剛果無顧避者  
莫如劉渙宏達有方畧者莫如孫沔至於帥領偏裨  
貴能坐運籌策不必親當矢石者王德用素有威名  
范仲淹素練軍政龐籍久經邊任皆其選也狄青頗  
能馭衆蔣偕沈毅有術畧張亢個儻有膽勇劉貽孫  
材武剛斷王德基純慤勁勇此可補偏裨者也時清  
臣以河北乏兵食自汴漕米繇河陰輸北道者七十

餘萬又請發大名庫錢以佐邊糴而安撫使賈昌朝  
格詔不從清臣固爭疏其跋扈乃徙昌朝鄭州清臣  
為侍讀學士知河陽卒贈左諫議大夫清臣天資爽  
邁遇事敢行數上書論天下事陳九議十要五利皆  
當世可行者有文集一百六十卷子均字公秉尚書  
司封員外郎知洪州又以集賢校理再任熙寧中知  
蘇州清臣從曾孫夢得

夢得字少蘊嗜學早成多識前言往行談論娓娓不窮

登進士第調丹徒尉徽宗朝自婺州教授召為議禮  
武選編脩官用蔡京薦召對言自古帝王為治廣狹  
大小規模各不同然必自先治其心者始今國勢有  
安危法度有利害人材有邪正民情有休戚四者治  
之大者也若不先治其心或誘之以貨利或陷之以  
聲色則所謂安危利害邪正休戚者未嘗不顛倒易  
位而況求其功乎上異其言特遷祠部郎官大觀初  
蔡京在相位向所立法度已罷者復行夢得言周官

太宰以八柄詔王馭羣臣所謂廢置賞罰者王之事也  
大宰得以詔王而不得自專夫事不過可不可二者  
而已以為可而出於陛下則前日不應廢以為不可  
而不出於陛下則今日不可復若徒以大臣進退為  
可否無乃陛下有未了然於中者乎上喜曰邇來士  
多朋比媒進卿言獨無觀望遂除起居郎時用事  
者喜小有才夢得言自古用人必先辨賢能賢謂有  
德能謂有才故先王嘗使德勝才不使才勝德宗寧



以來在內惟取議論與朝廷同者為純正在外惟取推行法令速成者為幹敏未聞器業堪重識度經遠者特有表異恐用才太勝願繼今用人以有德為先二年累遷翰林學士極論士大夫朋黨之弊專於重內輕外具乞身先衆人補郡蔡京初欲以章貫宣撫陝西取青唐夢得見京問曰祖宗時宣撫使皆是見任執政文彥博韓絳因此即軍中拜相未有以中人為之元豐末神宗欲命李憲雖王珪亦能力爭此公

所見也昨八寶恩遽除貫節度使天下皆知非祖宗  
法此已不可救今又付以執政之任使得青唐何以  
處之京有慚色然卒不改三年以龍圖閣直學士知  
汝州尋落職提舉洞霄宮政和五年起知蔡州移帥  
潁昌府發常平粟振民常平使劉寄惡之宦官楊戩  
用事寄括部內得常平錢五十萬緡請糴粳米輸後  
苑以媚戩委其屬持御筆來責以米樣如蘇州夢得  
上疏極論潁昌地方與東南異願隨品色不報時旁

郡糾民輸錢就糴京師怨聲載道獨潁昌賴夢得得  
免李彥括公田以黥吏告訐籍郟城舞陽隱田數千  
頃民詣府訴夢得上其事捕吏按治之郡人大悅戩  
彥交怒尋提舉南京鴻慶宮改帥杭州建炎初勝捷  
軍校陳通作亂拘夢得殺運判吳昉及副將白均等  
高宗駐蹕揚州遷翰林學士兼侍讀除戶部尚書陳  
待敵之計有三曰形曰勢曰氣形以地理山川為本  
勢以城池芻粟器械為重氣以將帥士卒為急形固

則可恃以守勢強則可資以立氣振則可作以用如是則敵皆在吾度內矣因請上南巡阻江為險以備不虞又請命重臣為宣總使一居泗上總兩淮及東方之師以待敵一居金陵總江浙之路以備退保疏入不報既而上駐蹕杭州遷尚書右丞奏監司州縣擅立軍期司掎斂民財者宜罷上諭以兵食二事最大當擇大臣分掌顏岐康允之皆嫉夢得又與朱勝非議論不協會州民有上書訟夢得過失者上以夢

得深曉財賦乃除資政殿學士提舉中太一宮專提  
領戶部財用充車駕巡幸頓遞使辭不拜歸湖州紹  
興初起為江東安撫大使兼知建康府兼壽春等六  
州宣撫使時建康荒殘兵不滿三千夢得奏移統制  
官韓世清軍屯建康崔增屯采石閻臯分守要害會  
王才降劉豫引兵入寇夢得遣使至張偉諭才降之  
以其衆分隸諸軍濠壽叛將寇宏陳卞雖陽受朝命  
陰與豫通夢得諭以禍福皆聽命及豫入宏卞擊敗

之八年除江東安撫制置大使兼知建康府行宮留守又奏防江措畫八事曰申飭邊備分布地面把截要害約束舟船團結鄉社明審斥堠措置積聚責官吏死守又言建康太平池州緊要隘口江北可濟渡者共十九所願聚民兵把截要害命諸將度敵形併力進討金宗弼犯含山進逼歷陽張俊諸軍遷延未發夢得見俊請速出軍曰敵已過含山萬一金人得和州長江不可保矣俊趣諸軍進發聲勢大振金兵

退屯昭關明年金復入侵遂至壽州夢得團結沿江  
民兵數萬分據江津遣子模將千人守馬家渡金兵  
不得渡而去初建康屯兵歲費錢八百萬緡米八十  
萬斛權貨務所入不足以支至是禁旅與諸道兵咸  
集夢得兼總四路漕計以給饋餉軍用不乏故諸將  
得悉力以戰詔加觀文殿學士移知福州兼福建安  
撫使海寇朱明猖獗詔夢得挾御前將士便道之鎮  
或招或捕或誘之相戕遂平寇五十餘郡然頗與監

司異議上章請老特遷一官提舉臨安洞霄宮尋拜  
崇信軍節度使致仕十八年卒于湖州贈檢校少保  
程師孟字公闢高祖思吳越營田使徙家蘇州師孟起  
進士知吉水錢唐二縣皆有政聲通判桂州慶厯中  
詔近侍各舉所知柳植施昌言以師孟薦知南康軍  
楚遂二州提點夔路刑獄瀘戎數犯渝州邊使者治  
所遠在萬州有警率浹日乃至師孟奏徙於渝適凶  
歲以常平粟振民不足即矯發他儲不俟報吏懼白



不可師孟曰本道至都五千里必俟報餓者盡死矣  
竟發之全活四十餘萬從河東路岢嵐等郡無常平  
粟邊民饑或竄出境師孟請出祠部牒募民納粟置  
倉廩以儲之晉地多土山旁接川谷春夏大雨水濁  
如黃河俗云天河可溉灌師孟勸民出錢醢渠築隄  
淤良田萬八千頃哀其事為水利圖經頒之州縣召  
為三司度支判官居一歲知洪州歲積薪為江隄師  
孟始疊石易薪以紓民力浚章溝揭北閘以節水升

降後無水患興利除害一方甚賴之英宗即位召判  
三司都磨勘司委以商度河北四權場利害師孟請  
減物直償閣欠以來北賈接伴契丹使蕭惟輔曰白  
溝之地當兩屬今南朝植柳數里而以北人漁界河  
為罪豈理也哉師孟曰兩朝當守誓約涿郡有案牘  
可覆視君舍文書滕口說詎欲生事耶惟輔媿謝使  
還除利路轉運使改江西路盜發袁州州吏為耳目  
久不獲師孟械吏數輩送獄盜即成擒初江西茶禁

既通賦民納茶租號白紐錢師孟奏令鬻茶者計斤  
輸稱頭錢代其數以除民患至熙寧中以師孟之請  
頒下諸路俄傳交趾為寇加直昭文館知福州築子  
城建學舍禮賢才興教化罷鐵錢餽疾救荒蘇息以  
萬計治行最東南閩父老謂國朝守郡者謝泌以惠  
愛著蔡襄以威名顯兼之者程公而已移知廣州大  
脩學校日引諸生講解負笈而來者甚衆諸蕃子弟  
皆願入學以右諫議大夫再任在廣六年威愛並行

初州城為儂寇所毀即有警民駭竄方伯踵至皆言  
土疏惡不可築師孟作西城廣十二里及交趾陷邕  
管聞廣守備固不敢東上遣中使撫問召判三班院  
又念前功以為給事中集賢脩撰判都水監賀契丹  
生辰至涿州契丹命席迎者正南向涿州官西向宋  
使价東向師孟曰是卑我也不就列自日昃爭至暮  
從者失色師孟辭氣益厲叱儉者易之於是更與迎  
者東西向明日涿人餞于郊疾馳過不顧涿人移雄

州以為言坐罷歸班改判將作監起知越州寬猛適中而事自治民愈愛戴之師孟喜遊山民為開道稽山門外號廣平路官制行換太中大夫尋以通議大夫知青州京東安撫使暮年告老遷正議大夫致仕哲宗即位授光祿大夫卒年七十八師孟累領劇鎮為政簡而嚴所至囹圄空虛道不拾遺罪非死者不以屬吏發隱擿伏如神得豪惡不逞跌宕者必痛懲艾之至勦絕乃已所部肅然洪福廣越為立生祠為

人樂易純質喜為詩效白樂天而尤簡直至老不改  
吳語與王安石有場屋之舊晚相遇猶如布衣時既  
歸吳過蔣山安石為留數日謂之曰君尚欲仕乎曰  
猶可更作一郡安石大喜知其無隱情也朱長文論  
師孟為政以為韋丹治豫章孔戣帥嶺南常衮化七  
閩無以加也天下以為才卿吏師米芾亦云師孟以  
文學登科以政事躋顯以言語出疆以恬退告老足  
之所及功利蔚起所著詩集二十卷奏議十五卷

徐祐字受天靜海人擢進士第為吏以清白稱官至左  
司員外郎以都官郎中致仕慶厯中屏居蘇州作山  
亭膏門外為登臨之地與葉參為九老會卒年七十  
五子仲謀典郡持節以職方郎中致仕

崇大年字靜之慶厯進士厯知青田縣民病無以納和  
買大年悉令候冬熟州符督責追杖縣吏大年曰年  
凶民苦催督必破產雖杖胥史三五輩尚可寬一邑  
之民至冬民輸無不足者徙知浦城縣舊設兩棧民

以事追去無輕重悉置棧中大年曰此以牛馬吾民  
悉命撤去以疾旬分司歸吳日與程師孟諸老觴詠  
燕遊號吳門十老大年志尚夷曠恬於勢利不求聞  
達辭卻薦辟浩然易退吳士自陳君子之奇以後大  
年繼有賢稱分司後十三年致仕又十四年卒年八  
十二朱長文與鄉人議謚謂黔婁辭國有餘富其  
謚曰康淵明隱約就閒其謚靖節大年當有道之世  
秉難進之節韜章蘊能不自表襮仕而知止貧而亡



憂凜然有古高士之風因謚康靖先生

閻丘孝終字公顯嘗知黃州作栖霞樓為野中勝絕未  
幾挂冠歸與崇大年輩以耆德著稱鄉里蘇軾云蘇  
州有二丘不到虎丘即到閻丘其為名流推重如此  
錢象先字資元郡人進士高第呂夷簡薦為國子監直  
講歷權大理少卿度支判官河北江東轉運使召兼  
天章閣侍講詳定一路敕成當進勲爵仁宗以其母  
老欲慰之獨賜紫章服進待制知審刑院加龍圖閣

直學士出知蔡州象先長於經術侍邇英十餘年有所顧問必依經反復諷諭及當世之務帝留神文藝禮遇甚渥故事講讀官分日迭進象先已得蔡帝猶諭之曰大夫行有日矣宜講徹一編於是同列罷進者浹日徙知陳州復兼侍講知審刑院象先旁通法家說故屢為理官條令多所裁定嘗以為犯赦者重犯令者輕請違勅入令者甚衆又議告捕法以為罪有可去有可捕苟皆許捕則姦人將倚法以害善良

因削去許捕百餘事其持心平恕類此復知許潁陳  
三州以吏部侍郎致仕熙寧九年卒年八十二

蔣堂字希魯宜興人擢進士為楚州團練推官滿歲引  
對真宗善其所試判特授大理丞知臨川富人李甲  
為不法前令莫能制堂戒諭不悛白州以兵索其家  
得僭乘輿物置于死歷通判眉許吉楚四州以太常  
博士知泗州召為監察御史論禁中火宜責躬脩德  
不必歸咎宮人及論奏郭后不當廢坐贖再遷侍御

史判三司度支勾院出為江南東路轉運使徙江淮  
發運事時廢發運使上封者屢以為非便堂言唐裴  
燿卿劉晏第五琦李巽裴休皆嘗為江淮河南轉運  
使不聞別置使名國朝王嗣宗劉師道亦止為轉運  
兼領發運司事而歲輸京師常足時雖用其議後卒  
復在江淮歲薦部吏二百人或謂曰一有謬舉且得  
罪何以多為堂曰十得二三亦足報國坐失按蘄州  
王蒙正故入部吏死罪降知越州州之鑑湖漢馬臻

所為溉田八千頃食利者萬家前守建言聽民自占  
多為豪右所侵堂奏復之徙蘇州入判刑部徙戶部  
勾院歷戶部度支鹽鐵副使安撫梓夔路擢天章待  
制江淮制置發運使先是發運使上計造大舟數十  
載物入遺權貴堂曰吾豈為此歲入自可附驛奏也  
前後五年未嘗一至京師就除河東路都轉運使未  
行知洪州改應天府累遷左司郎中知杭州以樞密  
直學士知益州慶歷初詔天下建學漢文翁石室在

孔子廟中因廣其舍為學宮選屬官以教諸生楊曰  
嚴在蜀有能名堂素不樂之於是節遊宴減厨傳專  
尚寬縱頗變曰嚴之政又建銅壺閣伐木於漢昭烈  
惠陵江濱祠又毀后土及劉禪祠蜀人浸不悅獄訟  
滋多久之或以為私官妓徙河中府又徙蘇杭二州  
以尚書禮部侍郎致仕初堂徙家吳中守杭時復治  
谿館將歸休焉既而告老賦隱圃詩自號遂翁所居  
嘗有芝知州李仲偃名其里曰靈芝坊至和初卒年

七十五特贈吏部侍郎堂為人清脩純飭遇事不屈而樂施好學工文辭延譽晚進尤嗜作詩有吳門集二十卷子之奇字頴叔孫續皇祐中僉判平江軍堂卒續自言少孤育於祖乞服衰粗以報朝議以堂有子不許遂辭疾謁醫去職行服嘉祐三年知吳縣事陳之奇字虞卿其先長安人唐末徙吳曾祖贊明吳越中吳軍節度推官祖郁贈太子贊善大夫父質殿中丞以德行著稱鄉里贈刑部侍郎之奇天聖中禮部

進士廷試下第里居十年無仕進意其母丁謂妹也  
謂欲授以官之奇有兄郢亦以琴書自怡皆力辭之  
後勉使之奇就舉之奇不得已又以進士為鄱陽尉  
歷丹徒泰興二縣令李瑋上公主詔舉經術行義者  
為隴西郡王宅教授數月告歸即致仕郡留其奏不  
可遷太子中允俄除平江軍節度掌書記復以為教  
授詔賜金錢促遣之卒不起以太常博士賜緋魚袋  
間居十八年之奇孝親信友約身篤行好學知道心



襟泊素聲利不能遷家居與鄉黨同憂樂赴人之急  
至於州縣無所避州縣以其至誠亦不為疑平居靜  
默與人言忠孝立身娓娓不倦持已謹嚴而外簡曠  
不為矯刻之行賙贍宗族貧而竭力吳人言家行者  
必推之莫不以為愷悌君子每出乘羸駒里巷小人  
見之斂然曰此吾陳君子也四方賢士大夫至吳必  
問所在爭欲一見蔣堂語人曰舉天下皆知有富貴  
而虞卿獨以知止易衆人之心吾喜林下有人也當

是時胡瑗以經術教授諸生蘇舜欽以文章退居山林之竒以德行棄官而歸名動海內稱吳下三賢人熙寧初卒王珪為誌題曰太常博士致仕陳君子之墓富嚴青田人其祖居吳而葬因占籍焉嚴慶厯初由三司戶部判官除尚書刑部郎中知蘇州四年改兵部知泉州八年以太常少卿知越州嘉祐中以祕書監再守蘇秩滿告老未嘗一造官府以耆德著稱鄉人因名其居曰德壽坊卒贈司徒子臨亦有文名終

知池州平江節度推官嚴曾孫元衡

元衡字公權幼入太學有聲擢進士第調隨縣主簿  
建炎初為襄陽撫司機宜都督張浚以才薦改秩  
為諸王宮大小學教授大宗正丞紹興十一年以左  
宣教郎知江陰軍十二年詔諸路州學委守臣修  
葺具次第驛聞元衡出緡錢五十萬鳩工掄材庸間  
民以服役閱月而功成嘗辨盜之不應死者全活  
數十人皆感泣改興國軍二十六年知袁州逾年遷

湖南常平改利州路提刑蜀舊例監司交餽不下  
數千緡元衡悉拒不納再移湖北專以平反為心  
隆興中召還中塗遇盜行李為之一空帥李師顏  
餽以匣金元衡不啟緘謝絕之除工部郎中嘗曰  
吾家以清白相傳今不暇足矣疏乞骸骨詔以內  
閣奉祠制詞有知止不殆之語元衡因揭知止名  
其堂以慶禮成賜金紫官至朝散大夫卒年八  
十六元衡守節清慎終始不渝時論仰之倣蘇軾

書能逼真尤善柳葉篆

鄭夷甫郡人少登科有美才嘉祐中監高郵軍稅遇一術士能推人死期無不驗謂夷甫命不過三十五歲夷甫叵堪或勸其讀老莊以自廣有金山僧與人談笑間化去夷甫聞之喟然曰既不得壽得若此僧復何憾哉乃從佛者授楞嚴經歲餘忽有所見曰生死之理我知之矣遂釋然放懷無復芥蒂後調封州判官預知死期先旬日作書與親舊訣及次叙家

事至期沐浴更衣公舍外有小園面溪一亭夷甫至其間督人灑掃及焚香揮手指畫之間屹然立化家人奔呼已僵立如植木一手猶作指畫之狀郡守而下少時皆至士民觀者如堵墻明日乃斂高郵崔伯易為墓誌叙其事

沈括字存中本錢唐人兄邁徙蘇州括以蔭任沭陽主簿縣依沭水即周禮所謂浸曰沂沭故跡久為污澤括新其二坊疏水為百渠九堰以節宣原委得上田

七千頃復以吳縣籍登嘉祐八年進士第編校昭  
文書籍為館閣校勘刪定三司條例遷太常丞同  
脩起居注加龍圖閣學士坐事謫均州徙秀州以光  
祿少卿分司居潤卒年六十五括學術浩博文藝  
深長經史之外天文方志律厯音樂醫卜諸家無  
不通練皆有論著喜建事功所著夢溪筆談行于世  
陸綰字權叔常熟人本名絳字伯厚見前史同姓名者  
不道更今名舉進士昆弟分產綰推先疇付之捐俸

振族篤教孤姪各登科名歷知揚子雍丘二縣終朝  
奉郎尚書職方郎中充淮南等路制置發運司運  
鹽公事字民加卹而臨吏加嚴務以推治豪右用  
懾服彊禦為職名震仕塗卒於真州官舍贈中  
散大夫所著春秋新解三十卷歌詩尤膾炙人口  
滕元發初名甫字元發避諱改字為名而字達道其先  
東陽人父高用薦為祕書郎尤長於性理卒葬吳縣  
遂為蘇人元發母夢虎行月中墮其室而元發生家



俊慷慨不拘小節九歲能賦詩范仲淹之父墉元發  
諸舅也嘗教以為文及仲淹守鄉郡元發受學於胡  
瑗舉進士授大理評事通判湖州孫沔守杭見而異  
之曰奇才也後當為賢將授以治劇守邊之畧召試  
為集賢校理開封府推官鹽鐵戶部判官同脩起居  
注英宗書其姓名藏禁中未及用神宗即位召問治  
亂之道對曰治亂之道如黑白所以變色易位者朋  
黨汨之也上曰卿知君子小人之黨乎曰君子無黨

譬之草木綢繆相附者必蔓草非松柏也朝廷無朋黨雖中主可以濟不然雖上聖亦殆上以為名言進知制誥知諫院御史中丞王陶論宰相不押班為跋扈上以問元發元發曰宰相固有罪然以為跋扈則欺天陷人矣知開封府拜御史中丞种諤擅築綏州且與薛向發諸路兵環慶保安皆出標掠夏人誘殺將官楊定元發上疏極言諒祚已納款不當失信邊隙一開兵連民疲必為內憂又中書樞密制邊事多

不合中書賞戰功而樞密降約束樞密詰脩堡而中書降褒詔元發言戰守大事也而異同如是願敕二府必同而後下宰相以其子判鼓院諫官謂不可上曰鼓院傳達而已何與於事元發曰人有訴宰相使其子達之可乎上悟罷之京師郡國地震元發上疏指陳致災之由大臣不悅出知秦州上留不遣館伴契丹使楊興公開懷與之語興公感動將去泣而別河北地大震令元發為安撫使時城舍多圯吏民懼

壓皆幄寢芡舍元發獨處屋下曰屋摧民死吾當以身同之瘞死飼饑除田租脩隄障察貪殘督盜賊北道遂安除翰林學士復知開封府民王頴有金為鄰婦所隱閔數尹不獲直頴憤而致偃扶杖訴于庭元發一問得實反其金頴投杖仰謝失偃所苦夏國主秉常被篡元發言李繼遷死時李氏幾不立矣當時大臣不能分建諸豪乃以全地王之至今為患今秉常失位諸將爭權天以此遺陛下若再失此時悔將

無及請擇立一賢將假以重權使經營分裂之可不  
勞而定百年之計也上奇其策然不果用元發在上  
前論事如家人父子言無文飾洞見肝膈上知其誠  
盡事無巨細人無親疎輒皆問之元發隨事解答不  
少嫌隱王安石方立新法天下洶洶恐元發有言為  
上所信因事以翰林侍讀學士出知瀛州元發以父  
諱改鄆州入辭言于上曰臣知事陛下而已不能事  
黨人願陛下少回當日之眷無使人為黨人所快則

天下知事君為得而事黨人為無益矣上為改容徙  
定州初入覲言新法之害且曰臣始以意度其不可  
耳既為郡乃親見之歲旱求言又疏奏新法害民者  
陛下既知之矣但下一手詔應熙寧二年所行有不  
便者悉罷之則民心悅而天意解矣皆不聽在定以  
邊人畏服上喜令再任詔曰寬嚴有體邊人安焉遂  
作安邊堂歷青州應天府齊鄧二州會婦黨李逢為  
逆或因以擠之黜為池州未行改安州侍郎韓丕旅

殯於安五十載學士州人鄭獬既沒十年貧不克葬  
元發皆葬之人高其義元發流落且十載猶以前過  
貶居筠州或以為復有後命元發譚笑自若曰天知  
吾直上知吾忠吾何憂哉遂上章自訟有曰樂羊無  
功謗書滿篋即墨何罪毀言日聞上覽之惻然即以  
為湖州哲宗登位徙蘇揚二州除龍圖閣直學士復  
知鄆州學生食不給民有爭公田二十年不決者  
元發曰學無食而以良田飽頑民乎乃請以為學

田遂絕其訟時淮南京東饑元發慮流民且至將  
烝為癘疫先度城外廢營地召諭富室使出力為  
席屋一夕成二千五百間井竈器用皆具民至如  
歸所全活五萬人徙真定又徙太原元發治邊凜  
然威行西北條畫有方號稱名帥河東十二將其  
八以備西邊分半番休元發至之八月邊劇來告  
請八將皆防秋元發曰夏若并兵犯我雖八將不  
敵若其不來四將足矣卒遣更休防秋將懼扣閣



爭之元發指其頸曰吾已舍此矣頭可斬兵不可  
出是歲塞上無警詔以四砦賜夏人葭蘆在河東  
元發先畫境而後棄且曰取城易棄城難令步將  
訾虎領兵護邊夏不敢近夏既得砦又欲以綏德  
城為法畫境出二十里外元發曰是一舉而失百  
里必不可久上章爭之以老力求淮南乃為龍圖閣  
學士復知揚州未至卒贈左銀青光祿大夫諡章敏  
子祐以蔭補官歷戶部員外郎徽宗即位使察訪嶺

南將大用之大臣不樂中以飛語坐廢久之起知通  
閬二州不赴改邠州人繪像事之又改撫池二州祐  
弟祁知鄜州贈武義大夫祁弟裕判吉州元發弟中  
中字元直以蔭補官將作監主簿官制行換承奉郎  
歷監瀛州倉草場知安吉縣明州市舶通判原莫二  
州保安軍知解州移虢州鹽法弊朝命復任解州官  
至承議郎廉勤自將治民守邊所至有聲尤長於詩  
崇寧五年卒年五十六

元絳字厚之其先臨川人姓危氏曾祖仔倡唐末聚眾  
保鄉里進據信州為楊渥所敗奔杭州祖德昭吳越  
丞相錢鏐惡其姓易為元絳生而敏悟五歲能詩九  
歲謁荆南太守試以三題上諸朝貧不能行長舉進  
士以廷試誤賦韻得學究出身再舉登第調江寧推  
官攝上元令民有王豹子豪占人田畧男女為僕妾  
有欲告者輒殺以滅口絳捕置于法甲與乙被酒相  
毆擊甲歸卧夜為盜斷足妻稱乙告里長執乙詣縣

而甲已死絳勅其妻曰歸治而夫喪乙已服矣陰使  
謹信吏跡其後望一僧迎笑私語絳命繫僧詰妻姦  
狀即吐實人問故絳曰吾見妻哭不衰且與傷者共  
席而襦無血污是以知之范仲淹為安撫使表其材  
知永新縣豪子龍聿誘少年周整飲博以技勝之計  
其貲折取上腴田立券久而整母始知之訟于縣索  
券為證則母手印存弗受又訟于州于使者擊登聞  
鼓皆不得直絳至母又來訴絳視券呼謂聿曰券年

月居印上是必得周母他牘尾印而撰偽券續之耳

聿駭謝即日歸整田為著作佐郎知海門縣

一作淮靜海

民多盜販鹽制置使建言滿二十斤皆坐徒絳曰海濱之民恃鹽為命非羣販比也答而縱之擢江西轉運判官知台州大水冒城郭民廬蕩析絳出庫錢即其處作室數千區命人自占約三歲償費流移者皆復業又甃其城因門為牐以禦湍漲後人遵其法入為度支判官儂智高叛嶺南宿軍邕州而歲漕不足

絳以直集賢院為廣東轉運使建瀕江水砦數十以待逋寇繕治十五城樓堞械器皆備軍食有餘以功遷工部郎中歷兩浙河北轉運使召拜鹽鐵副使擢天章閣待制知福州進龍圖閣直學士徙廣越荆南為翰林侍讀學士初上欲擇人王安石對有真翰林學士第恐陛下不能用况已作龍圖閣學士難下遷知制誥遂召入中外大驚迄有稱職之譽預議僖祖神主祧遷請以僖祖為始祖廟詔從之知開封府拜

三司使叅知政事數請老上以其子耆寧孝謹好學  
命校書崇文院慰留之會太學虞蕃訟博士受賄事  
連耆寧當下獄絳請上還職祿而容耆寧即訊於外  
從之於是御史至第薄責絳絳一不自辯罷知亳州  
入辭帝謂曰朕知卿一歲即召矣卿意欲陳訴乎絳  
謝罪願得賴即以為賴州上賜坐使服學士金帶如  
舊明年加資政殿學士知青州過都留提舉中太乙  
宮力疾入謁曰臣疾憊子弱儻一旦不幸死則遺骸

不得近先人丘墓帝惻然曰朕為卿辯護雖百子何以加詔母多拜乘輿行幸勿扈從又明年以太子少保致仕絳所至有威名而無持操少儀矩仕已顯猶謂遲晚在翰林諂事王安石及其子弟時論鄙之然工於文辭為流輩推許景靈宮作神御十一殿成夜傳詔草上梁文遲明上之雖在中書而帝下書詔猶多出其手既得謝帝眷眷命之曰卿可營居京師朕當資金幣且便者寧仕進絳曰臣有田廬在



吳乞歸鬻之即築室都城得望屬車之塵幸矣敢  
覬賜邪既行追資白金千兩敕蚤還絳至吳中與  
程師孟為九老會有居第在帶城橋鄉人榮之因  
號為袞繡坊踰歲以老病奏恐不能奉詔三年而  
卒年七十六贈太子少師謚章簡詔其家集文章  
上之有文集四十卷讞獄集十三卷子耆寧耆弼

徐師閔字聖徒其先建安人父奭歷官蘇浙子孫遂為

蘇人

奭事具  
宦蹟條

師閔治平初虞部員外郎知江陰軍作

漏壺脩鼓角門熙寧十年以司農少卿知袁州時江西劇賊詹遇屠劫列城為之騷動袁獨預脩武事具戰艦號令嚴肅常若寇至遇引避不敢犯境袁民歌之且有瑞粟嘉禾之異繪圖以進為治鎮靜有惠愛吏民生為立祠轉運蔣之奇薦於朝部使者第課優等知洪州王韶皆列奏留再任尤為蔣堂蔡襄所知在官自輔臣以下薦之者幾百人官至正議大夫東海郡侯告老以中散大夫普寧郡侯致仕有以黃白

術為獻師閔問能久乎曰五十年乃變耳師閔曰吾平生不妄語若欺人於五十年後豈吾心哉退居里中與元絳程師孟輩以詩酒為樂號十老鄉人榮之年八十卒子鑄

鑄字元鈞年少入官有能名吏不敢欺及為縣所至屏姦惡辯疑獄勸本業脩學校課常居最政和初提舉兩浙常平脩松江隄易土以石闢常熟水田數百頃為之疆畝越四年以直祕閣就除轉運副使明年遷發

運副使賜金帶數月以徽猷閣待制知杭州及代以杭人安其教令特除延慶殿學士又歷廣揚二州終正奉大夫子端仁承務郎監平江市易務鑄從子林

林字稚山祖師回字望聖熙寧間駕部郎中嘗知南康軍蘇轍為作直節堂記父閔中為吏有能名歷鄂州司法吏部郎直祕閣林少有特操中進士第與王黼有連不肯附麗之寧坎墮卑官紹興初上書言事召

改官累遷太府少卿出為江西轉運副使劾秦檜親  
黨坐是以沮經界法貶興化軍十三年更化復入為  
刑戶二部侍郎論國用太廣宜撙節之隆興初為吏  
部侍郎復論符離之役非計遂以敷文閣直學士奉  
祠知平江府力辭旋乞致仕再以給事中召不起遷  
龍圖閣學士當時稱賢關從以林為首卒年八十餘

紀聞云紹興中林坐關鼎所引忤秦檜罷宗關少卿  
又以前任江西按檜妻之第王昌復為檜所憾諷兩  
浙轉運誣林沮均田法安置興化軍周必大云稚山  
初言兵不可輕用忤王龜齡而去湯丞相疑可助已

薦為給事中累辭竟不起  
人始服其通介而不徇時

子臧

藏字子禮由進士知饒州以居吳去親遠乞易旁小州  
便養乾道初改知江陰軍新廟學刊書籍二年遣轉  
運副使姜詵按視水利臧延見父老審訂其說謂江  
陰北臨大江地勢洿下港瀆善淤夏秋淫雨浙西數  
郡百川並委瀕港七鄉並湖三山低卽之田混為一  
區尋丈而增膚寸而落十年之間沒休者一百六十  
萬餘畝歲蠲秋苗以一二萬計公私交病遂請治蔡

涇廢牐牐之故基距河差遠兩翼迫感波流悍急易  
於隕壞乃移基並東直抵漕渠斥而大之易木以石  
長各十有三丈四尺高一丈八尺洪之濶二丈三尺  
岸之西北滙為渦矗分殺水怒土木鐵石之工萬有  
九百費錢三萬二千三百緡米一萬一千四百石各  
有奇於是增浚漕渠下通黃田以防汎溢絕壅滯五  
旬而畢又奏本軍地狹民貧有續添認納臨安府買  
紬絹四千餘匹兼累遭大水百姓顛賴因此重斂上

為蠲八之五命下之日歡聲動阡陌三年改浙東  
提舉常平五年知秀州藏有學尤善漢隸書弟兢  
兢字明叔生數月見字畫輒色喜踊躍至十餘歲穎異  
不羣人謂騎省後身年十八入太學後以父任補通  
州司刑曹事辟入阮冶司幕攝事雍丘民服其化獄  
訟衰止移攝原武縣時有挾其弟貴勢者威震郡邑  
檄邑治市炭後至與慢令者兢歎曰令不賢不能庇  
民忍至此極耶疏聞諸朝願以身贖無辜當國者曰



使縣令皆如徐兢天下有不治乎宣和中以禮物官  
隨路允迪使高麗撰高麗圖經四十卷上之徽宗覽  
書大悅召對便殿賜出身擢大宗丞兼掌書學以篆  
名家遷刑部員外郎時相冊免坐親嫌謫監池州永  
豐監起除沿江制司叅議奉祠吳中二十年而卒弟  
德止遜官於從子而學佛徽宗賜號圓通禪師  
錢藻字醇老吳越王元瓘子儼入朝為昭化節度守和  
州儼生昭慈昭慈生順之藻順之子也舉說書進士

又舉賢良方正皆中英宗時為祕書校理三上書請  
慈聖光獻太后歸政天子神宗時稍遷直舍人院同  
脩起居注擢知制誥直學士院除樞密直學士知開  
封府以慈恕簡靜為體不求知名以投世取顯遷翰  
林侍讀學士封仁和縣伯元豐五年卒藻刻厲為學  
於書無所不治已通其大旨至於分章別句類數辯  
名叢細委曲無不究盡見於文辭閑放雋偉為人清  
謹寡過居守繩墨立朝無矯亢亦不雷同世利澹如

人稱長者子僧孺初藻受學於胡瑗用和州貫登第  
母丁氏葬天平山遂為蘇人

孫載字積中曾祖漢英錢氏時為崑山鎮防遏使遂為  
縣人父偁官至通議大夫發運大使載登進士為河  
中府戶曹更三守皆立威嚴載獨與爭曲直不肯詭  
隨守終乃稱薦之中書檢正官察訪關中辟為官屬  
乾祐縣令不肯奉行青苗法察訪使檄載按之載言  
邑小民貧歲以黍麥博易為生今無罪不果按用薦

者遷知德清縣以德化民不專任刑罰開誘是非出於誠信訟有累年不決者得一言皆感悟舍去熙寧八年吳越饑獨縣中熟載勸大家倍糴得十五萬斛明年春米價翔踊載使平直以糴全活甚衆移考城縣一日巡尉來告盜集境上將以上元掠近郭至期載張鐙設宴不禁夜盜叵測遂遁去訖受代無復盜者神宗以載姓名付中書除廣東常平觸暑行部以宣德意元祐初通判陝州遷廣東轉運判官紹聖初

除河北西路常平改知海沂二州延聘名儒興學養  
士遷朝奉大夫知婺州除河東轉運判官移淮西提  
點刑獄建中靖國初遷朝請大夫知亳州所至為治  
務大體時號循吏以嘗薦元祐黨人勾閒授提舉洞  
霄宮大觀中以朝議大夫致仕一日徧謁先隴及嘗  
往來者未幾疾革問日早晏盥手焚香而逝年七十  
二載天資樂易長於吏治好汲引士類受薦者至四  
百餘人後多知名少喜讀易著釋解五十卷文集若

十卷

張僅字幾道舉進士與里人顧棠皆為王安石門下士  
安石作三經義二人與焉僅官至著作佐郎而卒棠  
字叔思撰周易義類三卷

郭附字明仲郡人以進士知新建縣俗健訟好持吏短  
長附至問民疾苦皆以鷙獸暴橫為言乃檄旁縣尉  
併力仍以厚賞啖壯士不閱月得獸數十尸諸庭乃  
號於衆曰有悍不率教如此獸者皆殺之無一人敢

犯令者熙寧中以大理寺丞權知崑山縣官至朝奉大夫致仕幅巾策杖窮山林詩酒之適者十八年東南高士皆樂與之遊卒年八十四孫元邁在忠義傳郊亶字正夫太倉農家子自幼讀書識度不凡嘉祐中進士初授睦州團練推官知於潛縣未赴熙寧三年詔天下陳理財省費興利除害之策亶自廣東安撫司機宜文字為書陳蘇州水利王安石善之五年授司農寺丞提舉興脩兩浙水利民不為便遂罷歸治

所居之西水田曰大泗瀼者如所陳之說為圩岸溝  
澮場圃俱用井田之制歲入甚厚圖狀以獻且以明  
前法非苟然者復為司農寺簿遷丞預修本寺制式  
頗號完密除江東轉運判官元祐初入為太府丞出  
知温州以比部郎中召未至卒年六十六有吳門水  
利書四卷行於世其說見水利條亶子僑字子高一  
字喬年負才挺特亦為王安石所器許鄉里推重謂  
之郊長官有幼成警悟集亶孫升卿字師古由進士



知常徽二州乾道六年自徽代還奏蠲本州額外剝  
科雜錢一萬二千餘緡及元認江東兩浙運司諸處  
絹一萬六千六百餘匹其勤恤民隱類此

朱長文字伯原其先剡人世仕吳越祖億宋太宗朝內  
殿崇班閣門祇候知邕州累贈刑部尚書由開封來  
蘇州又為蘇人父公綽光祿卿知舒州長文方在娠  
所生周夫人夢覆錦衾或曰是生子能文矣比生十  
歲能屬辭讀書輒竟夕從泰山孫復授經於太學無

所不知尤邃於春秋博聞強識篤學力行年十九擢  
乙科進士第吏部限年未即用時公綽守彭長文不  
俟燕歸州人榮之既冠授祕書省校書郎守許州司  
戶叅軍以墜馬傷足不肯從吏趨郊裡公綽欲以任  
子恩勾長文幕官長文推與其季從悌丁父憂家居  
凡二十年築室故吳越錢氏金谷園知州章岵表曰  
樂圃鄉人遂稱為樂圃先生郡將監司莫不造請謀  
政士大夫過者必往見之以後為恥名動京師元祐

中起為本州教授州有兩教授以長文故也同舉者徐積陳烈時號三先生長文早歲作東都賦論者謂不減班張太沖其教人先經術而後詞章授學者春秋洪範中庸無慮數百先是范仲淹始建州學歲久墮廢其子純仁以侍郎制置江淮漕事復請修構長文有力焉吳中水灾長文陳五浦之利不果行又作救荒議四篇上知州黃履行之民賴以安歷五考召為太學博士著釋問以見意紹

聖間改宣教郎除祕書省正字兼樞密院編脩文  
字元符初卒年六十哲宗嘉其清賻絹百匹博士  
米芾為表其墓長文資稟忠朴雖在布衣慨然有  
用世之志暨出仕以田疇委諸弟惟藏書二萬卷  
所撰春秋通志二十卷又有書贊詩說易解禮記  
中庸解琴臺志琴史六卷蘇州續圖經五卷又撰次  
古今文詞為吳門總集二十卷樂圃文集一百卷書  
倣顏真卿所集周穆王以來金石遺文名人筆迹

作墨池閱古二編藏于家其叙琴史有曰方朝廷成  
太平之功制禮作樂比隆商周則是書也豈虛文哉  
其志槩可見矣從子良在忠義傳良五世孫寤炎  
寤炎字明叔幼穎悟以祖處大蔭授將仕郎寶祐二年  
銓中授迪功郎海鹽尉改泰州司戶叅軍咸淳三年  
調定城簿七年轉真州司法叅軍制置使印應雷知  
州王起宗朱煥咸稱廉敏聽訟決獄深得其情多以  
郡政委之先是軍餉所收綱米每病濕惡寤炎斥去

網人饋送事例積弊屏除在郡有鑒江倡和集癘炎  
性倜儻善持論見義必為為詞章慕朱希真亦名曰  
樵唱集卒年六十二

丁偃者長文同年進士也初試邇英進講藝詩云白虎  
前芳掩金華舊事輕天心非不寤垂意在蒼生有古  
詩諷諫之體是歲奏名甚高而御前下第自是二十  
年方中選

李璋居盤門負不羈之才王安石尤愛其人屢見於詩

後改名玖以累舉特恩補官孫益字彥中登進士  
第徙居常熟紹興間監察御史

黃彥字修中其先浦城人父挺字公操章得象薦為  
吳縣尉歷秀州司理餘杭尉筠州判官守太子洗馬  
致仕賜五品服與章岵等為十老會累贈金紫光  
祿大夫彥熙寧中以王安石經說與弟頴俱第進士  
安石舉為越州教授遷瀛州防禦推官知崇德縣  
長興丞以省罷知浦江縣清直明恕民畫像祠之紹

聖中知虹縣有廟吏謠言井蛇為龍水能愈疾彥以蛇磔死妖乃不興又麥秀兩歧蝗不入境時稱有古循吏風除楚州教授宗正寺簿改富陽令為政如前時坐法免管勾嵩山崇福宮官至朝奉大夫致仕政和四年卒頡字升中官至朝議大夫彥子策策字子虛九歲能屬文嘗追和梁昭明所選詩持見蘇軾軾曰子異時必以文顯弱冠擢第歷雍丘主簿齊州教授元符末詔中外言事時昭慈聖獻皇后既復



位號而典冊有未盡正者策引古誼上書甚切蔡京  
深銜之崇寧初黨籍羈管登州會赦還鄉後為發  
運司屬官斥賣京家貨得京草復元祐皇后制所  
錄上皇聖語親劄副本上進見神宗悔悟之心欽聖  
詔復之旨隆祐誣抑之由由是京主並后以遂復廢  
之姦益明建炎中追錄黨人除直祕閣通判嚴州初  
欽宗在青宮時聞策名大書隨緣堂三字以賜因自  
號隨緣居士子維纓字端冕宣和末屢上書言事

李綱為行營使嘗居幕府遭亂還鄉陳長方稱為干  
人之英紹興初以文名策有隨緣居士集四十卷纓  
有感事詩纓子季魯字道夫有集十卷皆附焉策弟  
簡字能甫黃氏自挺以下居吳縣聚鵝山為縣中大  
族至宋亡僅十餘世

或云策之後有名簡字元易者  
盧氏云熊按譜系非此一族

陳睦字子雖祖絳莆田人官至右司諫徙家蘇州兄侗  
進士知汝州富弼辟為從事召除館閣校勘歷衛尉  
少卿元豐中知陝湖宣三州睦第進士治平中詔舉

館閣才學之士睦與劉放李清臣輩首被選擢拜監察御史熙寧中提舉兩浙常平以曾公亮薦遷提點刑獄坐是免官元豐間高麗數遣使脩貢朝廷以其恭順選使諭旨初命林希希辭命睦睦即日就道上喜語輔臣曰林希無親堅辭不往睦親在乃不憚行假起居舍人直昭文館特贈仙華金帶使還言故事惟寶文閣直學士以上乃服金帶今請上所賜特旨令服之仍真拜所假官職又於令式外賜金錢其後

錢總楊景畧援例欲服金帶上弗許尋直龍圖閣知  
潭州改寶文閣待制知廣州子彥文字經仲建炎  
二年以龍圖閣待制知江州視事方十日會盜張  
遇犯城彥文極力固守遇乃引去明年為沿江措  
置使尋躋法從彥文弟彥武字緯叔為提舉官  
張詵字樞言父沔浦城人刑部郎中直史館致仕來寓  
蘇州因家焉詵第進士通判越州民患苦衙前役詵  
科別人戶籍其當役者以差入錢為顧人充皆以為

便知襄邑縣擢夔路轉運判官錄辟土功加直集賢  
院改陝西轉運副使召對帝曰朕未識卿每閱章奏  
獨卿與蔡挺有所論請使人了然尋當以師事相屬  
及入辭賜服金紫明年直龍圖閣知秦州前此將吏  
貪功多從羌地獵射因起邊患詵至申令毋得犯獲  
一人斬諸境上羣羌感悅遷天章閣待制知熙州董  
氈遣鬼章逼岷州詵往討董氈逆戰破之于錯鑿城  
斬首萬級元豐四年以龍圖閣直學士知成都府徙


杭州將行復命權知熙州經畧熙河事趣使倍道行  
時倉卒治戎有司計產調夫民多流亡詵中途詳其  
狀乞刺劍外招攜之不報會靈武師罷乃赴杭道京  
師帝訪以西事對曰彼勢雖弱而我師未銳邊備未  
飭願以歲月圖功累官正議大夫清河郡侯卒詵性  
孝友廉於財平生不植田業然既以建拓瀘夷地被  
進用後雖有善言可紀終不遑清議云弟詢字仲謨  
元祐中知湖州歷戶部員外郎直龍圖閣清河縣開

國子朝議大夫誥孫公秀

公秀字仲實從葉適游甚密風流詞翰推重一時紹興初為崇德丞遂寓郊野作漁簑堂知臨海縣尤有善政

孫冲字子和少負才名受知王安石嘗著鄉黨傳說二論安石大奇之知含山縣號為循吏律已甚嚴一毫不妄取秩滿率家人解其歸裝老獲有畜一砵者冲視之曰非吾來時物也命還之薦章交上改宣德郎

未幾卒年三十五



姑蘇志卷四十九



欽定四庫全書

史部

姑蘇志卷

五十一

詳校官編修<sub>臣</sub>曹振鏞

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>李 燾

謄錄監生<sub>臣</sub>張 恒

欽定四庫全書

姑蘇志卷五十

明 王鏊 撰

人物八

名臣

方惟深字子通其先泉州人父龜年字壽先才氣卓犖  
日能十賦為公卿所稱與同安蘇緘齊名官至屯田  
郎卒葬長洲因家焉惟深鄉貢第一試禮部不中即  
棄去有田厯與其弟躬出入耕穫間則讀書凡黃帝  
老莊之言養生為壽者之說以至西方別傳皆得其

大指平居視之猶木雞也及論議古今道理窮覈至到確然莫能移常以雅道自娛每一篇出人爭傳誦王安石以為精淳警絕元白皮陸有不到處惟深雖游安石之門極蒙愛畧無一毫迎合意以韋布之士閉關陋巷而孝友清介之風隱然稱東南其文學行義與朱長文同為一世所宗號鄉先生元符初郡將薦于朝崇寧中復以遺逸應詔皆不起有司舉貢籍以年格應補軍州助教者就賜敕牒袍笏於其家得

興化軍助教初年四十無子而弟有子以為先人有  
後足矣即屏居於外預知死期期至不亂喪葬皆有  
治命年八十三有詩集十卷

楊懿孺字彞甫其先自浦城徙長洲以行義隱處與方  
惟深同時號吳中二老懿孺少孤力學言行相顧朝  
無夕儲神夷氣昌未嘗有憂雖閭里不盡知其貧崇  
寧二年特奏名後調南昌簿居一歲忽載妻子歸吳  
下即告老以承奉郎致仕平居任真自信不知世間

有傾巧事不入州縣不事鄉里請謁間一詣所親厚  
歲不過數四雖嘗出仕而人猶謂隱者

章甫字端叔自建州徙居於蘇八世祖及唐康州刺史  
及孫仔鈞仔釗俱仕閩王審知至甫曾祖可濬始登  
第官至秘書丞甫熙寧進士初調臨川尉有盜劫殺  
行商獄詞連逮者以十數甫辨三人抵罪餘悉縱之  
知壽春縣大臣以甫孟子解義進詔付秘書省除應  
天府國子監教授改知山陰縣訟牒繁劇豪民竄易

戶名以避徭役甫得其情流配數人老姦宿贓屏息  
聽命邑以大治又濬海塘經畫為久計得以溉田哲  
宗即位除通判宿州南京押綱侍禁吏士宗侵耗官  
米反訟倉官獄久不決朝廷委甫治之士宗竟坐流  
竄以父憂去久之入為太府寺丞召對稱旨除府界  
提舉常平增浚河隄饑民之在境者因廩給之徽宗  
朝知虔州還奏淮南歲凶宜加賑恤大臣初雖諱言  
而卒如其請崇寧初除都官郎中陞對抗言元祐臣

僚削秩投荒皆緣國事稍稍內徙道路交慶今復刻  
名黨籍禁錮子孫恐非陛下本意上雖優容卒與時  
論不合致仕歸吳起知秦州尋請祠以歸甫寡嗜欲  
唯藏書萬卷讐校精密子八人憲最知名四世孫康  
在隱逸傳

憲字叔度居黃邨樂道好德操履高潔行有餘力而以  
學文鄉里謂隱君子與弟愬俱受學王蘋游於楊時  
朱震呂本中諸公間憲尤邃於春秋宣和中貢監漢

陽軍酒稅沒於兵有復軒集十卷

邊裕字道夫其先楚邱人父珣英宗時平江軍節度推官官至太子中舍始家于吳裕為泰州司錄時年尚少知州張次山果於為政興舉廢事投竄姦吏有稱於時多裕毘助之又以江寧府司錄監湖州酒歲荒餓莩橫道知州張詢委以賑卹全活甚衆有寓士疾革裕初未識之即親饋藥死歛以棺衾後二十年其子知章過湖故老相指曰此吾邊司錄子也歷睦州



團練推官改潤州觀察推官潤之鎮官戴昭信卒當  
任子莫肯保奏裕率同僚以事聞朝廷遂官其後辟  
江都縣遷開封新城左廂公事銳於決遣庭無留人  
廂素號難理專以婦女為訟爭至是相戒無犯郊恩  
賜五品服監大觀東庫除管勾南京留司御史臺公  
事卒年六十四裕通習時政歷仕四十年所至莫不  
畏愛子知章在忠義傳知章弟知白

知白字公式孝友篤實循蹈規矩清虛寡欲號為吉人

宣和中以進士為吳縣尉紹興中歷戶部郎官將作  
監戶吏二部侍郎直學士院嘗使金闕欲侵蜀歌蜀  
道難以諷金遂輟西南之役官至吏部尚書同安縣  
開國侯卒贈徽猷閣待制少師子維石通判杭州維  
成朝請大夫裕從子惇德

惇德字公辯祖珉始家崑山父靜贈承事郎惇德幼孤  
至孝貧不廢禮才思敏給以能詩名為范成大所知  
嘗與唱和五中鄉舉就奏名年逾六十即致其事郡

縣列上行義特改通直郎仍著為令撰脂韋子五十  
卷子瀛字道卿與弟濟並有學行濟子應升字子用  
穎悟力學篤守操履淳祐特科進士丹徒簿應升子  
雲遇字龍光寶祐進士咸淳二年江陰縣西尉雲遇  
弟實凌萬頃同修崑山志裕七世孫景元

景元字長卿端謹力學累世明春秋嘗指堂扁世麟字  
以示子孫曰此文丞相天祥手書以美吾祖者也吾  
子孫可忘之乎景元初由青陽教諭轉處州路學錄

以薦為國子伴讀辭歸教生徒會長洲邑學久廢乃  
勸富家大興建之子昌字伯盛承家學教授終日端  
坐不苟談笑張氏據郡以禮招致誓死不就

鄭景平初名安平字晞尹熙寧三年與父仲同登進士  
第景平剛正不撓居官有廉介稱嘗為大理官每有  
疑獄中夜拜禱蘄得其情既而請老家居詔復起知  
饒州數月拂衣而歸或問故荅曰天子命景平為郡  
當以撫字為職乃不得行其志今日須金若干明日

須粟若干民已枯骨矣捶考之亦何以取景平安得不歸時多附朱勔獨景平終始不阿子裊字天和亦能文屢任郡守

丁隲郡人元祐中為左正言五上章論何正臣治獄殘酷巧詆刻深甚於羅織黨錮事載國史

章崇字質夫其先浦城人祖頻為御史忤章獻后旨黜官仁宗欲用之而卒贈司徒父訪禮賓副使乃徙蘇號曰北章贈大尉崇以叔得象蔭為孟州司戶參軍

將作監簿應舉入京聞父對獄于魏棄不就試馳往  
直其寃還試禮部第一擢知陳留縣以最聞歷提舉  
陝西常平京東轉運判官提點湖北刑獄成都路轉  
運使入為考功吏部右司員外郎元祐初直龍圖閣  
知慶州時朝廷戢兵戒邊吏勿妄動且捐葭蘆安疆  
等四砦予夏使歸其永樂之人夏得砦益驕案言夏  
嗜利畏威不有懲艾邊不得休息宜稍取其土疆如  
古削地之制以固吾圉然後諸路出兵擇據要害不

一再舉勢將自蹙矣遂乘便出討以致其師夏果入  
圍環州竊先用間知之遣驍將折可適伏兵洪德城  
夏師過之伏兵識其母梁氏旗幟鼓譟而出斬獲甚  
衆又預毒於牛圈豬水夏人馬飲多死召權戶部侍  
郎明年除知同州紹聖初知應天府加集賢殿修撰  
知廣州徙江淮發運使哲宗訪以邊事對合旨命知  
渭州至即上言城胡盧河據形勢以徧夏乃以三月  
及熙河秦鳳環慶四路之師陽繕理他堡壁數十所

自示其怯或以綦怯請曰此夏必爭之地夏方營石  
門峽去我三十里能奪而有之乎綦又陽謝之陰具  
板築守戰之備帥四路迎擊敗之既而環慶廊延河東  
熙河皆相繼築城進拓其境夏人睜視不敢動夏主  
遂奉其母合將數十萬圍平夏疾攻十餘日建高車  
臨城填塹而進不能克一夕遁去夏統軍嵬名阿里  
西壽監軍妹勒都逋皆勇悍善戰綦謀其弛備命折  
可適郭成輕騎夜襲直入其帳執之盡俘其家虜馘



三千餘牛羊十萬夏主震駭哲宗為御紫宸殿受賀  
累擢樞密直學士龍圖閣端明殿學士進階大中大  
夫案在涇原四年凡創州一城砦九薦拔偏裨不間  
廝役至於夏降人折可適李忠傑朱智用咸受其馭  
夏自平夏之敗不能復軍屢請命乞和哲宗亦為寢  
兵案立邊功為西方最時章惇用事案與惇同宗其  
得興事頗為世所疑徽宗立請老徙知河南入見留  
拜同知樞密院事俾其子緯為開封推官以便養踰

年力謝事罷授資政殿學士中太一宮使未幾卒上  
悼惜賜龍腦水銀以飲命其壻劉何使兩浙共葬事  
贈右銀青光祿大夫太師秦國公謚莊敏賻卹甚厚  
立廟懷德軍賜額曰忠烈七子緯綜縉綰縉縉綜  
歷通判常州綰知丹徒縣縉字彥升簽判蘇州通直  
郎易州通判縉孫茂承奉郎蓋監蘇州稅史誤云  
謚莊簡  
緯字伯成繇推官為戶部員外郎提點淮南東路刑獄  
權知揚州兼提舉香鹽事時方鑄崇寧大錢令下市

區盡閉人持錢買物至日旰皇皇無肯售緯飭市易  
務致百貨以小錢收之且檄倉吏糶米以大錢予之  
盡十日止民心遂安未幾新鈔灋行舊鈔盡廢一時  
商賈束手或自殺緯得訴者所持舊鈔為錢以千計  
者三十萬上疏言錢灋誤民請如約以示大信蔡京  
怒罷緯降兩官以緹故竄台州復通判秀州初染教  
子極嚴閉置一室中故緯與綽皆有文名緯晚年詩  
益高清真雅健得唐人風有文集三十卷終戶部郎

中

綽字子京有大志中進士第一調洛陽簿時范純祐為  
尹一見待以國士賓禮異絕與韓玉汝李邦直等俱  
以文行薦於朝就除京兆府教授政和末起知解州  
移均州房州婦人越所部訴其子於均綽謝曰房非  
吾治也又訴於轉運使使以屬綽召詣庭下不以屬  
吏鐫論開曉母子感悔拜謝而去歷陝西轉運判官  
入為戶部員外郎中書侍郎劉達妻綽之姊也達漸

復元祐之政諒多贊之蔡京欲擠達且忌諒不附已使其黨攻之出諒湖州論者不已差主管西京崇福宮坐縱獄竄溫州入為秘書省校書郎遷倉部員外郎宣和三年除提舉兩浙常平未上改提點刑獄時嘉興富人高安與陳氏有故怨乘方臘起誣以為盜聚羣惡操兵入其室盡殪之以捕盜徼賞及長洲陸氏怙富橫閭里殺人應捕輒賕吏執平人代已諒一閱盡得其情取二人寘諸灋衆懼以為神明四年以

直秘閣知越州兼浙東安撫趙新去方臘之亂人情  
危懼日三四驚旁郡守將往往益兵自衛繚至延問  
吏民宴集僚佐如平時有勇敢卒謀為變繚飭將吏  
指取無一人脫者闔郡大震譚稹宣撫燕山請繚為  
參謀轉朝請大夫右文殿脩撰遂疏燕雲決不可守  
之狀反復數千言金人破蔚州背歸山後議稹以錯  
置乖方罷繚落職送吏部及童貫出師而燕山七郡  
與朔武皆不守如繚言會赦恩上書告老復龍圖閣

直學士致仕卒

史云諒以龍圖閣直學士知越州按會稽志朝奉大夫直秘閣權發遣越

州續志云復

直龍圖閣卒

綆字君遂僉判西安州蔡京復相興制獄傾章氏綆居

蘇州或得私鑄錢數巨罌風言者誣綆與州人郁寶

所鑄詔遣李孝壽張茂直沈畸蕭服更往鞫之連繫

數百人累月卒無實獄多死者京大怒別遣孫傑鞫

之傳致如律綆刺面配沙門島追毀出身以來文字

除名勒停籍入其家竄縉台州綜秀州諒温州綰睦

州續永州茂處州蓋筠州官吏降罷除名者十餘人  
時論寃之孫傑擢龍圖閣直學士知蘇州張商英為  
相辯前獄移經常州諒復朝奉郎通判秀州頃之經  
改授內殿崇班諒秘書郎

顏孚字端中父長民以進士知長興縣孚崇寧間有聲  
太學士行甚美時人目為顏夫子爭願識面與兄采  
為繼擢高科孚早卒采字君用終提舉常平為字仲  
謙居官有威終知嚴州為孫儼進士



李撰字子約唐曹王明子偁居陳留至餘慶以國子博士知常州卒葬橫山遂為吳縣人撰之祖也撰熙寧中以進士歷彭澤令時括民田轉運使務苛擾欲多得匿戶羨田為功撰持不可抱牘抗論且請就劾并解印綬去使者度不可屈從之時王安禮為部刺史使者還金陵言撰所以期共構撰罪安禮曰縣令敢與部使者爭衡必介特有守士也亟呼吏就使者草奏薦之元祐三年議遣使脩復小吳河撰上復河賦

二篇言河不可復通判莫保二州官至朝奉大夫大  
觀三年卒年六十七撰廣孟子說著養氣論三篇毛  
詩訓解二十卷孟子講義十四卷文集五十卷史贊  
論五卷子彌遜

彌遜字似之登第調單州司戶再調陽穀簿政和四年  
除會要所檢閱文字引見特遷校書郎充編修六典  
檢閱累官起居郎以封事剴切貶知廬山縣改奉嵩  
山祠宣和末知冀州金人犯河朔彌遜捐金帛致勇

士修城堞決河護塹邀擊其遊騎斬首甚衆烏珠北  
還戒師毋犯其城靖康初召為衛尉少卿出知瑞州  
二年建康府牙校周德作亂執其帥宇文粹中殺官  
吏嬰城自守勢猖獗彌遜以江東運判領郡事喻以  
禍福勉使勤王德桀驚猶肆殺掠會李綱行次建康  
協謀誅德等尸諸市撫其餘黨一路遂安改淮南轉  
運副使奉興國宮知饒州紹興中召對奏當堅定規  
模排斥姦言輔臣不悅擬直寶文閣知吉州歲饑撫

卹疲困七年秋遷起居郎彌遜自被謫以來垂二十  
年及復居是職論事鯁切如初是冬試中書舍人奏  
六事曰固蕃維嚴禁衛練兵節用收民心擇守帥時  
駐蹕未定有旨料舟給卒以濟宮人彌遜繳奏曰六  
飛雷動百司豫嚴宜以宗社為心不宜於內倖細故  
更勤聖慮事雖至微懼傷大體帝嘉納試戶部侍郎  
秦檜再相獨彌遜與晏端復有憂色八年乞外不允  
趙鼎罷相檜專政金遣烏凌阿思謀入界甚悖檜於御

前求去欲決意從和胡銓乞斬檜范如圭曾開皆疏  
論檜相繼貶逐彌遜請對言金使請和欲行君臣之  
禮有大不可帝詔廷臣大議即日入奏彌遜手疏力  
言陛下受金人空言無一毫之得乃輕祖宗之付託  
屈身委命自同下國異時脫有意外之求不從則釁  
端復開其患未已檜嘗邀彌遜至私第曰政府方虛  
員苟和好無異議當以兩地相浼荅曰彌遜受國厚  
恩何敢見利忘義今日之事國人皆曰不然獨有一

去可報相公檜默然次日彌遜再疏辭愈切直檜大怒彌遜引疾帝諭大臣留之九年春上疏乞歸鄉里以徽猷閣直學士知端州改知漳州十年歸隱連江西山是歲烏珠分道入侵明年又侵淮西取壽春令竟如彌遜言十二年檜乘金兵既敗收諸路兵復通和好追仇向者盡言之臣嗾言者論彌遜與趙鼎王庶曾開四人同沮和議於是彌遜落職十餘年不通時相書不請磨勘不乞任子不序封爵以終其常憂

國無怨懟意二十三年卒朝廷思其忠節詔復敷文閣待制有奏議三卷外制二卷議古三卷詩十卷弟彌大

彌大字似矩登崇寧三年進士第以大臣薦召對除校書郎遷監察御史假太常少卿充契丹賀正旦使時傳聞燕民欲歸漢徽宗遣彌大覘之使還奏所聞有二或謂彼主淫刑滅親民心畔離女真侵迫國勢危殆為可取或謂下詔罪已擢用耆舊招赦盜賊國尚

有人未可取莫若聽其自相攻併遷起居郎試中書  
舍人同脩國史童貫宣撫永興走馬承受白鏐恃貫  
不報師期朝廷止從薄責彌大繳奏以為違報不至  
非朝廷福鏐坐除名彌大亦出知光州移知鄂州召  
為給事中兼校正御前文籍詳定官拜禮部侍郎金  
人大舉入侵李綱定策城守命彌大為參議與綱不  
合罷未幾除刑部尚書初朝廷許割三鎮畀金人遣  
种師道等援河北姚古援河東彌大上疏乞起河東



西境隣府諸郡及陝西兵以濟古之師起河東路及  
京東近郡兵以濟師道之師為腹背攻劫之圖遂除  
彌大河東宣撫副使張師正領捷軍敗於河東潰歸  
彌大誅之復遣餘卒援真定餘卒叛宣撫罷命彌大  
知陝州河東破偏將李彥先來謁言軍事大壯之留  
為將戍散澠間以遏敵詔遣使召援彌大未敢進會  
永興帥范致虛糾兵勤王檄彌大充諸道計議行至  
方城道阻乃率衆赴大元帥府建炎初除知淮寧府

到郡未幾杜用等夜叛彌大縋城出賊散乃還坐貶  
秩尋召為吏部侍郎帝如杭州命權紹興府試戶部  
尚書兼侍讀呂頤浩視師以彌大等為參謀官彌大  
奏王導謝安為都督未嘗離朝廷今邊圉幸無他頤  
浩不宜輕動又言已為天子從官非宰相可辟乞於  
諸軍悉置軍正如漢朝故事以察官郎官為之陛下  
必欲留臣當別為一司伺察頤浩過失忤旨出知平  
江府沈與求劾彌大謀間君臣妄自尊大奪職歸起

知靜江府奏廣西邊防利害入為工部尚書未幾罷去廣西提刑韓璜劾其在靜江日斷強盜引絞入斬貶兩秩紹興十年卒年六十一從曾孫韶

韶字元善彌遜之曾孫也父文饒台州司理叅軍每謂人曰吾司臬多陰德後有興者韶五歲能賦舉進士授南雄州教授調慶元史彌遠薦士充學職袁燮求射圃益其居韶皆不與變更敬之薦遷主管三省架閣文字由太學正升博士諫濟王竑獄旬外添差通

判泉州改知道州葺周惇頤故居錄其子孫於學宮  
且周其家紹定四年行都災應詔言事提舉福建市  
舶會星變又應詔言事入為國子監丞改知泉州兼  
市舶端平元年召明年轉太府寺丞遷都官尚左二  
郎官未幾拜右正言奏乞以國事邊防專委丞相鄭  
清之喬行簡各任責論弭兵節財及襄蜀邊防又論  
史嵩之王遂和戰異議迄無成功請出遂於要藩易  
嵩之於邊面使各盡其才史宅之將守袁州韶率同

列一再劾之俱不報乞解言職拜殿中侍御史辭不  
允又奏辭大意謂同言事者三人已皆罷免獨臣居  
職豈以臣言不加切於彼耶抑先去彼以警臣使知  
擇而後言耶今國柄有陵夷之漸士氣有萎靡之漸  
主勢有孤立之漸宗社有阽危之漸上下偷安以言  
為諱此意不改其禍豈直如彼所言而已時魏了翁  
予祠韶訟之乞召還處以台輔又劾陳洵益刑餘弄  
權乞予外祠又劾女冠吳知古在宮掖招權納賄宜

出之帝怒韶還笏殿陛乞歸會免二相以韶權工部  
侍郎正言遷起居舍人復疏洵益知古不報辭新命  
不許應詔上封事帝諭左右曰李韶真有愛朕憂國  
之心凡三辭不獲以生死祈哀帝感額謂曰曲為朕  
留退復累疏乞外以集英殿修撰知漳州朝廷時遣  
使諸路稱提官楮韶極言其敝嘉熙二年召疏言有  
不可進者四大意謂今之大患在敵兵歲至和不可  
戰不能楮券日輕民生流離物價踊貴遂至事無可

為必自上躬卧薪嘗膽改慮易聽然後可圖今二患益深雖欲效忠他莫可為說又史宅之于郡外議皆謂扳援者將復用故論列至再今聖斷赫然用舍由已環視前日在廷之臣流落擯棄臣雖欲貪進未知所以處其身又始蜀受兵廟堂已遣使至敵起蒿之於家而言者不已臣時以為講和固非策而首兵亦不能無罪故乞付高論者以兵事使稍知敵情者嘗試其說於閫外不知事勢推移遂成罷廢而疑敵無

功者白麻揚廷矣或者將議臣前日之有所附會也  
又昨彈內侍女冠未幾首相去位臣亦出臺其人謂  
臣受廟堂風旨故決意自外今臣言迄不行苟貪君  
命竊恐或者譏臣向何所聞而去今何所見而來也  
四年詔趣赴闕辭遷戶部侍郎再辭不許五年改禮  
部侍郎辭不允令所在州軍護遣至闕嵩之遣人語  
曰毋言濟邸宮媼國本韶不答上疏謂今天下事在  
陛下自任而力為又引左氏載史墨言魯公世從其



失季氏世脩其勤蓋以世卿諷高之也疏出高之不  
悅曰治春秋人下語毒時杜範亦在列中外稱為李  
杜兼侍講累辭兼國史編修實錄檢討辭遷吏部侍  
郎兼中書舍人三辭不許淳祐二年疏言宰相用人  
守法之繆又言濟王國本宮媼三上疏乞歸以寶章  
閣直學士知泉州辭乞畀祠不許既歸三辭仍職提  
舉鴻慶宮五年召再辭詔本州勸勉赴闕遷禮部侍  
郎三辭遷權禮部尚書復三辭不許詔又疏論嬪妃

貴戚世臣理財濟邸女冠儲嗣言甚危切又疏乞還不許兼侍讀三辭不許又三疏乞歸時游侶以人望用復有牽制之者韶又論之擢翰林學士兼知制誥兼侍讀不拜詔不許又三辭不許嵩之服除有鄉用意章琰李昴英黃師雍論列甚峻詔落職予祠韶同從官抗疏引春秋蔡人衛人陳人從王伐鄭見諸侯不從王之罪以為今陛下不能正姦臣之罪其過不專在上蓋大臣百執事不能輔天子以討有罪皆春

秋所不赦乞斷以此義亟賜裁處詔嵩之勒令致仕  
既而嵩之進觀文殿大學士韶疏爭之甚力未幾琰  
昂英他有所論列並罷言職韶復疏留之七年韶十  
上疏勾去以端明殿學士提舉玉隆宮應繇趙汝騰  
疏乞留韶內祠未報韶陞辭疏極剴切大畧謂彼此  
相視莫行其志而剴裁庶政品量人物於冥冥者不  
得不他有人是中書之手可束而臺諫之口可鈐事  
所當力為者不可枚舉而皆莫有任其責者矣改提

舉萬壽觀兼侍讀即出國門力辭道次衢州詔趣受  
命再辭仍奉祠玉隆宮八年被召辭不許再辭仍舊  
職奉祠萬壽觀兼侍讀令守臣以禮趣行又辭不許  
九年仍奉祠玉隆宮十二年祠滿再任卒年七十五  
韶忠厚純實平粹簡澹不溺於聲色貨利平時默坐  
一室門無雜賓

秦希甫字辨之元符中為陝西轉運判官初熙河將王  
膽下邈川胡宗回為帥復遣膽取青唐詔立鄯州而

以邈川為湟州未幾屬羌叛宗回討之數敗希甫奏  
王膽厚取邈川青唐府庫物因此致變又言自河至  
湟道路險阨往者如赴死所湟州本溫溪心故地當  
求溫氏之後立為屏輔皆在可棄事下宗回宗回持  
不可希甫罷去徽宗尋棄鄯州任伯雨再疏宗回罪  
奪職知蘄州崇寧初黨論起言者又以希甫棄地為  
罪降官入黨籍云

陸徽之字彥猷常熟人祖景字伯通景祐初及第官至

太常博士徽之由太學上舍生免殿試賜同進士出身終濮陽主簿高才博學衆推事之如陳起宗張柵錢觀復皆為顯人徽宗即位下詔求直言徽之廷對與雍孝聞輩皆力陳時政闕失唱名有旨放孝聞立殿下叩頭曰陛下求直言有云言之者無罪今詔墨未乾奈何以直言罪人衛士以拄斧撞其頰數齒俱落凡直言者盡揮出之大觀末彗星見始復收錄徽之欲赴會卒孫端成字夫錫就特奏恩

潘兌字說之吳縣人自進士累官中書舍人左諫議大夫刑禮吏三部侍郎歷顯謨閣待制知洪州終徽猷閣待制不登朱勔之門勔護父喪歸亦不往迎其先塋適有山林形勢近勔新阡勔欲得之脩敬于兌允殿門不納勔至京訴於上降御筆奪之尋假御史誣允以罪由是落職路允迪稱其言語文章一本六經之醇毅然有守終無玷缺與從子民瞻有唱和詩集周武仲字憲之浦城人太學生登紹聖進士第授將仕

郎諸暨縣尉繼主益都縣簿改從事郎知金華縣轉授泗州錄事參軍辟知浙江縣事前政以軟懦去官或經歲不決武仲到迎刃而解舊事決遣無留片言斷獄得其情偽人人信服邑以大治及代而歸士民攀號遮道絕梁不得行乃圖其像歲時祠焉尋改宣教郎亳州司儀曹事除武學博士擢監察御史時有上封事言淮南連歲荒旱民相食常平使者顧彥成坐視不救上怒詔武仲察訪亟行賑濟武仲陳八事



一乞依法放免租稅二乞諸司錢斛並許支用三乞州縣倚閣催民間積欠四乞常平司錢斛已椿發未行者並截留五豪戶有願出粟濟饑民者許保奏推賞六所在官山林塘治暫弛其禁聽饑民採食七鄰路般販米斛入本路者免收沿路力券廢得商旅輻湊八小民無業可歸願充軍伍者委漕司多方招刺以消攘奪之患上一一開允仍命行訖奏及疏降中書時宿守吳壽寧聞武仲將至令諸門毋納饑民城

外殭屍縱橫悉穴地藏之申以無饑民可抄錄真守  
蘇之悌夜遣兵仗逼饑民載之江州上悉致死二守  
皆宦官腹心旁連漕使孫點莫敢誰何武仲並劾之  
兩路所養饑民僅三十萬賑給缺食人穀十七萬有  
奇賑糶借貸穀三十餘萬勸誘人戶出糶及借貸七  
十萬有奇所全活者不計其幾萬也除尚書比部外  
郎遷右司外郎假太常少卿接伴遼使復充遼國賀  
正使及還覲河朔軍政不脩將士驕慢上疏論之言

兵可百世不用不可一日弛備上嘉納之再任言責未幾除顯謨閣待制充館伴使又差報聘充國信副使禮成而還進徽猷閣直學士復差館伴武仲與敵論議語言未嘗少假借非理之求一切不從聲聞館外上知之屢降宸翰言武仲氣直除刑部侍郎直學士院供職九日擢御史中丞差殿試詳定官兼侍讀屢上奏言時政童貫用事遂以本官提舉亳州明道宮遇赦復右文殿修撰貫復誣奏落職降授宣德郎

黃州居住淵聖登極復朝請郎覃恩轉朝奉大夫高  
宗即位武仲至南京賜對上疏勸上以固結人心為  
本上深然之除吏部侍郎扈從至揚州擢刑部尚書  
兼侍讀首在經筵獻納居多凡至安危治亂之機必  
旁搜遠攬極其規諫遷吏部尚書以病丐閒除龍圖  
閣學士提舉江州太平觀以朝請大夫致仕卒于揚  
州官館贈大中大夫子孫多居于吳曾孫曷為常熟  
尉曷孫才

才字仲美嘗領沿江制機檢察水部兵乙亥革命征南  
行省帥府檄才與武弁分撫郡之屬邑時軍伍貪恣  
日事標掠才撫諭之又枯人輸物不愜則魚貫斬首  
才悉解累械釋之不可勝數士卒掠他處生口賈粥  
才為館穀詢其鄉里父母歸之同里朱氏蘇氏世仇  
朱賂千戶期一夕焚蘇而屠之亦欲賂才才潛招蘇  
語其故俾亦啗千戶以利兩全之因招二氏曉以禍  
福令約為姻親遂釋怨丁丑歲有姦使謀袁謀以動

吳民才嘆曰吾始預撫安今茲復不順義一旦官兵  
來吳民其無噍類乎因諭以氣運在天不在人之理  
禁其姦不得發乃亟給帥閫撫諭符文迎勞官兵遂  
不入境人得以寧比境來避者亦廩給之後置縣設  
官領戶筭同寅上其功才曰吾前朝賤士也所以與  
世委蛇誠不忍生民塗炭耳茲得為太平民幸矣忍  
復希名位哉遂老於耕桑嘗著宋史畧十六卷吳塘  
集若干卷藏于家子文英以儒克世其業有澤物觀

民二藁及庭芳集其言見水利條

翟汝文字公巽其先丹陽人後徙常熟祖濤通三傳以禮學名知長洲縣贈太子太傅父思祕書監知應天府汝文登進士第以親老不調者十年擢議禮局編修官召對徽宗嘉之除祕書郎三館士建議東封汝文曰治道貴清淨今不啓上述三代禮樂而師秦漢之侈心乎責監宿州稅久之召除著作郎遷起居郎勸講皇太子除中書舍人言者謂汝文嘗從蘇軾黃

庭堅游出知襄濟唐三州以謝章自辯罷未幾起知  
陳州召拜中書舍人外制典雅一時稱之同修哲宗  
國史遷給事中高麗使入貢詔班侍從之上汝文言  
其不可乃如舊制梁師成彊市百姓墓田廣其圃汝  
文言於上師成諷宰相黜汝文守宣州召為吏部侍  
郎出知廬州徙密州密負海產鹽蔡京屢變鹽法盜  
販者衆有司窮治黨與汝文曰祖宗法度獲私商不  
詰所由欲靖民也悉縱之密歲貢牛黃汝文言牛失



黃輒死非所以惠農宜輸財市之則其害不私於密從之欽宗即位召為翰林學士改顯謨閣學士知越州兼浙東安撫使人安其政建炎初奏減和買絹錢以擅放稅降官紹興元年為翰林學士兼侍講除參知政事同提舉脩政局時秦檜相四方奏請填委汝文嘗受辭牒書字用印直送省部入對乞治堂吏受賄者檜怒面劾汝文專擅諫官方孟卿因奏汝文與長官立異先是汝文在密檜為教授嘗一薦其才故

檜引用之汝文性剛不為之屈或爭於殿廷至目為  
金人姦細必致誤國遂罷官以資政殿學士提舉洞  
霄宮歸吳卒門人私謚曰忠惠先生汝文與葉夢得  
汪藻孫覲俱以文名宣政間覲嘗自評云覲之視浮  
谿浮谿之視石林各少十年書石林視公巽亦然識  
者以為確論汝文辭章古奧制誥多法典謨好古博  
雅精於篆籀有文集若干卷祭儀十卷子耆年

張柵字材仲繇三舍法貢京師入太學登進士第初調

臨江軍司刑曹事知遂安縣方臘叛擁兵入邑丞簿尉皆遇害柵獨力戰不敵刃中脅擁入巢穴柵曉以逆順卒不敢加害臘既伏誅改秩知歸安縣臨安府通判知泰州鎮江衢州皆以惠愛稱柵性至孝在衢時母卒年九十九柵亦七十矣執喪甚至人咸敬之初得郊恩舍子予姪族人有喪不能舉者哀而葬之官至左朝散大夫卒年七十八贈正議大夫

陳起宗字興祖少入上庠踔厲有聲一日歸省屬同舍

生為投試卷起宗業禮記同舍嫉之輒易以周禮迫  
試乃告起宗遂用周禮試復第一登政和進士以徽  
猷閣學士知并州卒起宗善談辯詩篇灑落有陶謝  
風

錢觀復字知原於吳越為疏屬由太學登進士乙科常  
熟土著及第自觀復始教授瑞安時方臘猖獗觀復  
贊邑令王公濟備禦流民歸瑞安者相屬于道或議  
驅出境觀復曰孰為吾境迫之適資盜耳遂徙海洲

居焉調湖州戶曹朱勔以鄉人固欲妻以女辭不就  
授衢州判官敵騎犯浙觀復白郡守縱民老弱皆出  
戶留一丁不然者罪如軍法既而諸兵欲乘時為變  
顧城中子女無所獲乃止出知廣德軍歲上供民輸  
送回遠加斂水脚錢乃請寄廩湖之四安至國門才  
五日費減大半觀復深於易急於為義鄉里推之官  
至朝散郎贈金紫光祿大夫有文集十五卷論語解  
二十卷子俱

俱字廷碩一字惟大登進士乙科授泰州教授除太學  
正從容學省斂以靜退人莫窺其際改宣教郎宗正  
寺簿大府寺丞宗正丞旬外知袁州除著作佐郎遷  
將作少監請祠除福建路提舉終朝請郎俱寡嗜好  
惟藏書數千卷朱墨精謹皆所親校尤邃於易有文  
集五卷諸經講解十卷易經三卷弟佃

佃字仲耕以進士為分水尉池真二州教授改秩除諸  
王宮大小學教授遷大宗正丞通判太平州乾道七

年詔皇太子領臨安尹慎擇僚案佃自外任選為推  
官擢吏部郎中對便殿言三事上稱善累遷左右司  
檢正兼權吏兵工三部侍郎出為江西路轉運副使  
時盜賴文正起武陵朝廷調兵討之佃餉不乏繼使  
福建再使江西奏蠲諸路之逋淳熙八年婺州饑且  
缺守上曰錢佃可守郡既至禱雨鬚髮為白勸分逋  
粟所活口七十餘萬政甲一路提舉朱熹與陳亮書  
云發人得錢守比之他郡事體殊不同及作江西漕

司養濟院記謂其嘗奏免贛吉麻租二千四百餘斛  
兩州之人尤歌舞之婺州救饑之政亦為諸郡最所  
以稱舉者如此佃忠信篤厚根於天性臨政不求赫  
赫聲恒以字民為先務捐橐裝買田合族名曰義莊  
官至中奉大夫秘閣修撰卒年六十二有易解三十  
卷詞科類要二十卷文集二十卷

魏憲字令則吳江人與弟志俱進士有聲太學號熙豐  
人才憲累遷國子司業親喪三年弗御酒肉廬於冢



上有芝草甘露之祥再為司業以學行見推徧歷中  
外師儒之選兼太子舍人遷中書舍人給事中其文  
溫厚雅正得代言體宣和二年以直龍圖閣知常州  
三年除太常少卿歷顯謨閣學士知明州建炎二年  
為吏部侍郎時案牘散佚吏緣為姦有偽名寄貫之  
獎憲請嚴保任以覈實開告賞以止姦急期會以取  
闕以戢其弊又言古未有背天險以為都者敵騎由  
京西不四五日可至淮泗宜有以俟之以直學

士提舉江州太平觀歸卒年七十三志字幾道志四  
世孫汝賢淳祐四年特奏名狀元

曾懷字欽道公亮之曾孫世為晉江人由開封寓居常  
熟宣和初以父任調金壇簿常州吏張元貸民錢解  
發事敗或謂當死懷曰無文記以盜論今官有文記  
吏焉得死時車駕南巡懷以攝宰面奏上嘉獎令籍  
記姓名歷烏江令淞西帥司幹官知淳安縣濠太平  
二州通判提舉兩淞市舶知江州孝宗即位改真州

訓習民兵有紀張浚督師大奇之隆興二年為浙西  
提舉上以懷有應才除度支員外郎別置拘催錢  
物所令專行以豐裕聞進權戶部侍郎兼提領贍軍  
諸庫乾道初真除戶部侍郎奏臣不敢進生財之說  
以傷陛下愛民之心亦不敢進苦節之說以傷陛下  
惠下之心但量入為出使天下之財足天下之用上  
悅再歲除尚書在版曹凡五年未嘗以錢穀語人凡  
錢穀之數州郡所積與出納之多寡纖悉必記上以

蕭何劉晏目之丐閒除龍圖閣知婺州甫三月趣召  
面賜御書松賦以示歲寒之意復為戶部尚書八年  
除參知政事九年拜右丞相封魯國公淳熙元年除  
觀文殿大學士官觀甫及故里復拜右丞相兼樞密  
使以疾免朝參惟令入堂治事遇大政則宣引特令  
製輕小金帶以賜復力上印綬仍除觀文殿大學士  
宮觀歸觀遂卒年六十九贈少保懷由世家登宰輔  
以清約自持為相侃侃得大臣體常言事之大者視

之以小事之小者視之以無則天下無復事矣時以

為名言有文集三卷

泉州志隆興八年拜右丞相封魯國公今從史

邱礪字師說高唐丞礪之弟也世為眇山人少讀書刻

苦有志事功建炎初知吳江縣因家常熟入為國子

監丞御史臺檢法大理寺丞權戶部郎知筠泰建三

州除福建提舉兼提刑改轉運判官在建凡十年惠

政不可勝紀秦檜當國以礪同年生每示意嚮欲以

孫與礪女為婚礪不肯力請祠歸屏跡杜門以詩酒

自適奉祠凡十二年卒年七十六官至朝請大夫累  
贈光祿大夫礪天性純實自律甚嚴更迭中外二十  
年薄田數百畝不給則舉質以繼處之裕如有易議  
及超然類藁杜詩集句四子琛應博學宏詞科璋通  
直郎通判寧國府琛提舉福建市舶璠知舒州太湖  
縣璋子耒

耒字少潛以蔭授於潛簿慶元錄事參軍淮東轉運幹  
官所至有聲知海鹽縣興起學宮築捍海隄二十里

代民輸逋租郡有疑獄率委之平反守議賞輒辭之  
民爭先立石誦其德政薦者凡十八人監三省樞密  
院門遷將作監丞出知台惠撫三州皆不赴終朝奉  
大夫耒平生尚義加厚族黨捐田以予姪王萬謂其  
天資素高才足以運慮足以謀明足以察云子烈

烈字希文以父澤授蕪湖簿通州司理知丹徒縣真州  
通判端介有守咸淳十年為江東安撫司參議官明  
年北兵至使者委印而去城失守烈護印匿民間將

赴行在至吳遇疾知平江府陳謙亨提舉常平戴覺  
民為上印於朝方擬進秩而卒官至奉直大夫烈從  
兄岳

岳字山甫礪曾孫也祖据字伯玉受學北方紹興三十  
一年與其子松歸朝授据迪功郎招撫使準備差遣  
松下州文學遂家高郵据卒葬吳縣岳松之子也以  
進士授安慶太湖尉辟蘄州推官紹定三年李全弄  
兵于淮趙范趙葵奉命誅討辟岳入幙內則贊決謀



議外則受檄督戰卒殄凶酋又以行軍器監簿為范  
參謀入洛議興未嘗苟同歷通判黃州知真州禦韉

鞞以全城殲其渠帥

宋史云端平三年蒙古攻真州知州邱岳部分嚴明守具周悉

蒙古兵薄城輒敗岳乘勝出戰于胥浦橋以强弩射其致師者一人死敵少卻岳曰敵衆十備于我不可  
以力勝乃為三覆設砲石待之於西城敵至伏起砲發殺其驍將敵衆大擾岳選勇士襲敵營焚其廬帳  
越二日改兵部郎官淮東提刑兼提舉常平知太平  
皆引去

州兼江東轉運閱三月知江州兼沿江制置副使迨  
鎮淮東四年累疏求去淳祐十年以工部尚書召尋

謝事自鎮江徙居常熟十三年仍召為工部尚書辭之寶祐初授華文閣直學士沿江制置使兼知建康府江東安撫兼營田使行宮留守節制和州無為軍安慶府三郡屯田使丞相貽書奉上旨趣行舟發京口時北兵方闖廬和之境民被其害即調兵赴援趣新知和州印應雷出戍應雷奮然突入士氣益張卒保和州在官數月蒐軍實飭邊備皆有端緒三年授龍圖閣致仕卒年六十九岳自典郡持節躋從班開

制閫為時名臣在真州及淮閫兵將樂為之用凡四  
禦大敵皆數十萬衆未嘗少有敗衄泗水之捷俘獲  
不可勝計功績尤偉為人簡澹威重言不妄發望之  
似不可犯及造室論議洞然開示腹心表裏平實理  
宗嘗御書忠實二字賜之官至正議大夫封東海郡  
侯卒贈銀青光祿大夫累贈特進岳四世孫迪

迪字彥啟幼孤養于外家孟氏成童侍舅潼游匡廬白  
鹿洞讀書得謁熊天慵天慵異之留講下勉之以義

理之學及歸教授鄉里湯彌昌龔璠黃潛咸相與接  
每推譽焉少工尚書義應舉再不利遂不復求仕退  
讓自持人亦不敢狎侮所著尚書辯疑玉淵雜著雲  
麓文藁若干卷

王綯字唐公審琦五世孫也建炎初為御史中丞金人  
入侵具陳攻守之策宰相不能用車駕南渡扈從至  
鎮江從容奏曰陳東以忠諫被誅此其鄉里也上即  
命賙其家官其子東宮初建綯以資政殿學士權太

子少傅三年拜參知政事明年罷紹興三年出知越州及上幸越韓世忠邀擊金歸騎於楊子江綯議遣兵追襲與世忠夾擊之同政者議不合遂求去御書霖雨思賢佐丹青憶老臣十字以賜之綯為人剛正有守立朝無所阿附及居政府每以祿不及親自奉甚薄不置第宅晚寓崑山之薦嚴寺蕭然一室服食器用無異寒士天性仁孝賙卹族無所不至紹興七年卒年二十四謚文恭前期二日書戊戌字示左

右及卒果然平居無他嗜好惟以讀書為樂其文溫潤典雅深於理致有內外制四十卷奏議三十卷進讀事實五卷論語解二十卷孝經解五卷羣史編八十卷內典畧錄一百卷子陔

凌哲字明甫宣和中進士高宗朝自明州通判召對擢為御史數日遷右正言初周望守平江金人入侵望遁去以罪責死連州至是其家自陳詔復故官澤及其子哲因追數望棄城罪惡竟寢其命及上疏論秦

氏親黨因緣科第有妨寒畯進取之路又奏王會前  
知湖明二州及移平江恃權貪酷乞投竄遐裔以為  
慢令賊民之戒會竟編管循州遷左司諫吏部侍郎  
兼侍講以數文閣待制知台州遂退歸鄉里十餘年  
以通議大夫致仕卒年八十六哲為人端重簡默澹  
約自守雖處侍從不啻寒素非時未嘗至郡府終歲  
無所干請居鄰有茶肆日為市井俚俗所聚哲徙避  
之人服其德量目為凌佛子

鄭作肅字恭老以進士歷通判杭州紹興五年知常州  
初唐獨孤及為刺史有甘露降於廳事作肅因勑凝  
露堂而為之記二十四年知吉州還朝奏郡中歲輸  
黃河竹索錢河久陷敵境錢何從歸乞賜蠲免其他  
循襲似此者亦乞盡行除放高宗嘉納且喻秦檜稱  
獎再三檜怒諷以在任不法興大獄繩治之逮吏及  
門以檜殂得免二十八年知鎮江府嚴殺牛之禁有  
牛奔至府治果將就屠者人皆異之三十二年冬改



知湖州孝宗即阼手詔獎諭隆興二年歲歉民貧有  
生子不舉棄於道路者作肅令屬官尋訪收取又擇  
乳母為之保養月給贍米一石委請學官專蒞其事  
條具事目刻石州縣遂為其邦著令

孫緯字彥文擢進士第歷宗正寺丞官至尚書郎為人  
誠朴好以俗語為詩文而近理尤精於一時典故所  
著有集謚總錄本朝人物志

唐輝字子明郡人居崑山以文章名登進士第紹興中

為諫官時盧知原知臨安府為政乖謬輝論罷之官  
至禮部侍郎弟熒子子壽並進士

王葆字彥光崑山人祖申以學行推于鄉父億樂道好  
善贈右中散大夫葆幼有志識弱冠通諸經縣人自  
孫載後六十年葆始上進士第紹興改元上疏陳十  
弊深中時病未言儲嗣尤切直至謂仁宗時中外晏  
然而范鎮等為國遠計汲汲在此況今日國步多艱  
人心易動彊敵未靖羣盜陸梁天下之勢危如綴旒

而甲觀之崇未聞流慶中外惴恐此為甚急願為宗社計廣求宗室中仁明孝友時論所歸者歷試諸事以係人心執政讀而奇之遂自麗水簿遷知宜興縣兩淮用兵制亦盜起邑當孔道寮吏懼乏軍興相次駭竄葆白父母食君祿無愛死理第可終養毋以葆為念也明日取丞簿印兼佩之諸將妄求輒面折力拒乃稍稍自戢歷監登聞檢院宗正寺丞遷司封郎官兼國子司業秦檜嘗語葆曰檜欲告老如何葆曰

此事不當問葆檜曰他人不敢言以公有直氣故問爾葆曰果欲告老不問親讐擇可任國家之事者使居相位誠天下生民之福檜默然當是時百司莫敢可否事葆為考功御史獨伸滯直枉當官不避天子議置相人懷向背葆獨介然持正論出知廣德軍移守漢州綏善鉏姦境內大治擢瀘南安撫使知瀘州引用名士劾去貪殘吏數輩然後鎮以無事踰年遷池州孝宗召為大理少卿以疾辭道改浙東提點刑

獄屢行帥事疾惡彌厲權要皆不樂乃請祠歸宜興  
遂終老焉官至左朝請大夫葆學行俱至潛心古道  
教誘後生如親子弟沙隨程迥嘗受經於葆出其門  
者後多成立號稱鄉先生其學深於春秋著集傳十  
五卷備論二卷東宮講義三卷葆於人物鑒裁尤精  
李衡布衣流落一見以女弟歸之周必大未仕時亦  
妻以其子范成大蚤孤廢業葆喻勉切至加以詰責  
留之席下程課甚嚴後皆為名臣弟萬進士子嘉言

監南嶽廟嘉賓知餘干縣

李衡字彥平其先江都人高祖昭素侍御史曾祖詰祖處約父預至衡始居崑山少博學有局幹為文操筆立就紹興中第進士授吳江主簿部使者怙勢侵兵衡不忍以敲朴迎合即投劾去二十三年除仙居丞隆興初知溧陽縣為治彊敏專以誠意化民稅賦以期日榜縣門鄉無吏迹而取辦先他邑金人侵淮堦官沿江者多送其孥於內地衡自淞右迤家入縣民

心大安在官四年民未嘗犯重罪安撫汪澈運使韓元吉列上治狀召對陳便民十事詔進一秩除知溫州未行拜監察御史遇事敢言無所顧避出知婺州以循良著稱召為司封郎中遷樞密院檢詳加直秘閣屢上書引年除祕閣脩撰致仕孝宗思其樸忠詔落致仕拜侍御史固辭不獲張說以節度使簽書樞密時給事中莫濟不書勅直學士周必大不草制衡與王希呂上疏謂不當以母后肺腑掌兵柄廷爭遂

時遷衡起居郎衡曰進而負君孰若退而合義章五  
上除知台州復力辭上知不可奪使仍以秘閣脩撰  
致仕四人同時去國衡歸崑山圓明野墅日與門人  
講解經義聚書踰萬卷名其室曰樂菴學者稱為樂  
菴先生卒年七十九衡宣和間入太學同舍生洛人  
趙孝孫勸衡熟讀論語且曰學非記誦詞章所以學  
聖賢耳不可有絲毫偽孝孫之父顏子實師程頤衡  
心佩其訓故雖博涉羣書而以論語為主本講學明



道樂於教人中年絕欲清修唯蒼頭給事臨沒沐浴冠櫛作手書數十別親舊戒子孫問天色何時答以月明翛然而逝周必大聞之曰此老平生跌蕩到此乃得力可敬羨也又曰彥平非逃儒入釋者而臨終超然如此殆聞道乎所著有易說論語說易義海最要樂菴文集總若干卷行於世

姑蘇志卷五十